

本經逢原

本經逢原

清長州石頑張璐路玉父纂述

四川人民出版社
一九五七年就渭
南嚴民原版印行

慕

本

經

緯

圖

旅
阮中
巽
題



光緒戊申樂文自滬南
嚴氏刊石成書

癸亥仲春

重校訂誤

本經逢原小引

醫之有本經也猶匠氏之有繩墨也有繩墨而後有
規矩有規矩而後能變通變通生乎智巧又必本諸
繩墨也原夫炎帝本經繩墨之創始也大觀證類規
矩之成則也瀕湖綱目成則中之集大成未能達乎
變通也譬諸大匠能與人規矩不能與人智巧能以
智巧與人達乎變通之道者黃帝靈素之文也能以
炎黃之道隨機應用不爲繩墨所拘者漢長沙一人

而已長沙以天縱之能一脈相承炎黃之道信手皆
繩墨也未聞炎黃而外別有繩墨也嘗思醫林學術
非不代有名人求其端本澄源宗乎本經主治者玉
函金匱而外未之聞也長沙已往唐逸士千金方獨
得其髓其立方之峻有過於長沙者後世末由宗之
以故集本草者咸以上古逆順反激之用槩置不錄
專事坦夷以適時宜其間瑣瑣固無足論卽瀕湖之
博洽今古者尙爾舍本逐末僅以本經主治冠列諸

首以爲存羊之意惟仲淳繆子開鑿經義迥出諸方而於委婉難明處則旁引別錄等說疏作經言朱紫之混能無戾乎昔三餘喬子有本經註疏一冊三十五年於前於念菴先生齋頭曾一寓目惜乎未經刊布不可復覩因不自揣聊陳鄙見略疏本經之大義并系諸家治法庶使學人左右逢原不逾炎黃繩墨足以爲上工也上工十全六不能盡起白骨而生之吾願天下醫師慎勿妄恃己長以希苟得之利天下蒼

生確遵有病不治常得中醫之戒跳出時師圈績何
繩墨之可限哉

康熙乙酉春王石頑張璐書於雋永堂時年七十有九

本經逢原目錄

卷之一

水部

諸水

火部

諸火

土部

諸土

金部

金

赤銅

銅青

自然銅

古文錢

鉛

鉛粉

鉛丹

密陀僧

錫

鐵落

鐵砂

鐵精

鐵繡

石部

玉

雲母

白石英

紫石英

丹砂

銀硃

水銀

輕粉

靈砂

雄黃

雌黃

石膏粗理黃石

滑石

石脂

爐甘石

無名異

石鍾乳

附孔公孽

石灰

浮石

陽起石

慈石

代赭石

禹餘糧

空青

曾青

綠青

扁青

石膽

礬石

砒石

礞石

花蕊石

河沙

石燕

石蟹

蛇黃

附蛇
舍石

霹靂礶

鹵石部

食鹽

戎鹽 卽青
鹽

鹵鹼

凝水石

立精石

朴消

立明粉

風化消

硝石

礪砂

蓬砂

石硫黃

礬石

綠礬

山草部

甘草

黃耆

人參

沙參

桔梗

黃精

葳蕤

知母

肉蓯蓉

天麻

白朮

蒼朮

狗脊

貫眾

巴戟天

遠志

淫羊藿

仙茅

玄參

地榆

丹參

紫參

紫草

白頭翁

白芨

三七

黃連

胡黃連

黃芩

秦艽

柴胡

銀柴胡

前胡

防風

獨活

羌活

升麻

苦參

白蘚皮

延胡索

貝母

山慈姑

白茅根

草龍膽

細辛

杜衡

白微

白前

卷之二

芳草部

當歸

芎藭

撫芎

蛇牀

藁本

白芷

白芍藥

赤芍藥

牡丹皮

木香

甘松香

山柰

高良薑

草豆蔻

草果

白豆蔻

縮砂密

益智子

萹芡

蒟葉

肉豆蔻

補骨脂

薑黃

鬱金

蓬莪茂

荊三稜

香附

茉莉

排草

藿香

薰香

蘭香

澤蘭

本草綱目卷之六

亥醫國字初階

馬蘭

香薷

爵牀

荊芥

紫蘇

蘇子

水蘇

薄荷

隰草部

菊

艾

茵陳蒿

青蒿

茺蔚

薇銜

夏枯草

劉寄奴

旋覆花

青葙子

紅藍花

臙脂

大薊小薊

續斷

漏蘆

芋根黃麻

胡蘆巴

惡實

蒼耳

天名精

鶴蝨

豨薟

箬

蘆根

甘蕉

蘘荷

麻黃

木賊

石龍芻

燈心

生地黃

乾地黃

熟地黃

牛膝

紫苑

麥門冬

萱草

淡竹葉

冬葵子

蜀葵花

秋葵子

龍葵

酸漿

敗醬草

款冬花

鼠麴草

決明子

地膚子

瞿麥

王不留行

葶藶

車前子

馬鞭草

光明草

鱧腸草

連翹

陸英

藍實

大青
小青

青黛

蓼子

篇蓄

白蒺藜

沙苑蒺藜

穀精草

海金沙

地椒

半邊蓮

地丁

見腫消

毒草部

大黃

商陸

狼毒

狼牙

防葵

藺茹

大戟

澤漆

甘遂

續隨子

葇菑子

蓖麻子

常山

蜀漆

藜蘆

附子

川烏

天雄

側子

草烏

射罔

白附子

天南星

半夏

蚤休

鬼臼

射干

玉簪根

鳳仙子

曼陀羅花

羊躑躅

芫花

堇花

莽草

茵芋

鈎吻

蔓草部

兔絲子

五味子

覆盆子

使君子

木鼈子

馬兜鈴

青木香

預知子

牽牛

紫葳

施花

薔薇
營實

月季花

栝萋實

栝萋根

土瓜根

葛根

天門冬

百部

何首烏

華薜

之絲...

刻醫學初階

土茯苓

白欬

山豆根

黃藥子

白藥子

葳靈儂

茜草

防己

木通

通草

鈎藤

木蓮

紫葛

葎草

忍冬

清風藤

藤黃

水草部

澤瀉

羊蹄根

石菖蒲

蒲黃

苦草

水萍

蓴

海藻

昆布

石草部

石斛

骨碎補

石葦

景天

石胡荽

地錦

苔草部

陟釐

石蘘

卷栢

馬勃

倒掛草

苔

卷之三

穀部

諸米

諸麥

諸豆

胡麻

亞麻

麻子仁

薏苡仁

嬰粟殼

阿芙蓉

蒸餅

神麴

紅酒麴

飴糖

醋

酒

菜部

本草綱目卷之九

本草綱目卷之九

韭

薤

葱

蒜

薑

白芥子

蕪青

萊菔

生薑

乾薑

胡荽

藜香

蕪菜

波菜

蕪菜

同蒿

芥菜子

莧子

馬齒莧

翻白草根

蒲公英

落葵

蕪菜

蕪

黃獨

薯蕷

百合

茄

苦瓠

冬瓜子

越瓜

胡瓜

南瓜

絲瓜

苦瓜

紫菜

石花菜

木耳

桑耳

香蕈

麻姑
雞蹏

土蕈

果部

李根白皮

杏仁

梅

本草綱目卷之九
刻醫學初階

桃仁白

栗

棗

梨

木瓜

山楂

柰

林檎

柿蒂

安石榴

橘皮

青皮

橘核

橘葉

柑

橙

柚

柑櫞

金橘

枇杷葉

楊梅

櫻桃

銀杏

胡桃

長生果

貧貧葡萄

橡實

槲皮

荔枝

龍眼

橄欖

榧子

松子

刺馬檳榔

大腹子

大腹皮

檳榔

無花果

枳椇

水果部

西瓜

瓜子仁

甜瓜蒂

甜瓜仁

葡萄

甘蔗

本草綱目卷之... 刻醫學初階

沙糖

石蜜

蓮藕

蓮實

石蓮子

蓮鬚

蓮房

荷葉

芡實

芡實

烏芋

慈姑

味部

蜀椒

秦椒

椒目

豬椒根

胡椒

畢澄茄

吳茱萸

食茱萸

茗

香木部

栢子仁

栢葉節油

松脂

松節

杉

肉桂

桂心

牡桂

筒桂

桂枝

辛荑

沈香蜜香

丁香丁皮

旃檀

紫檀

降真香

烏藥

茴香

楓香脂

薰陸香

沒藥

麒麟竭

安息香

蘇合香

龍腦香

樟腦

阿魏

蘆薈

喬木部

黃蘗 小蘗

厚朴

杜仲

椿樗根皮

乾漆

梓白皮

梧葉皮

桐實

海桐皮

川棟子

槐實

槐花

本草綱目卷之九 木部 藥部

秦皮

合歡皮

皂莢

皂角刺

肥皂莢

無患子

沒石子

訶黎勒

柳華

檉柳

水楊

榆根白皮

蕪荑

蘇方木

樺木皮

櫻櫚

烏柏根

巴豆

大風子

相思子

灌木部

本草綱目卷之...
刻醫學初階

桑根白皮

桑椹

桑葉

桑枝

柘根白皮

楮實

枳殼

枳實

枸橘

梔子

酸棗仁

白棘

蕤仁

山茱萸

金櫻子

郁李仁

鼠李子

女貞實

枸骨

衛矛

南燭

五加皮

枸杞

地骨皮

溲疏

石南

牡荆

蔓荆子

紫荆皮

木槿皮

芙蓉

山茶

密蒙

木棉

柞木

黃楊

放杖水

接骨木

寓木部

茯苓

扶神

琥珀

豬苓

雷丸

桑寄生

之系送及夕一

丁刻醫學初階

松蘿

苞木部

竹葉

竹茹

竹瀝

笋

竹黃

震燒木

藏器部

錦

袴褶

裏脚布

鑿柄

弓弩弦

敗蒲扇

蒲蓆

漆器

燈盞油

炊單布

敗鼓皮

卷之四

蟲部

蜂蜜

蜜蠟

露蜂房

蠟螞

蟲白蠟

紫鈔

五倍子

桑螵蛸

雀甕

原蠶蛾

白殭蠶

蠶繭

蠶退

蠶沙

九香蟲

之絲

刻醫學初階

雪蠶

蜻蛉

樗雞

芫青

蟹螯

葛上亭長

地膽

蜘蛛

壁錢

蝥

水蛭

蛆

狗蠅

蟻螯

桑蠹蟲

桃蠹蟲

蚱蟬

蟬蛻

蜚蠊

天牛

螻蛄

螢火

衣魚

鼠婦

麤蟲

蜚蠊

即蠹蟲

蟾蜍

蟾酥

蟹墓

蛙

蚪蚪

蜈蚣

蚯蚓

蝸牛

龍蛇部

龍骨

龍齒

龍角

鼈甲

鯪鯉甲

石龍子

守宮

蛤蚧

蛇蛻

蝮蛇膽

白花蛇

烏蛇

蝮蛇

魚部

鯉魚

鱣魚

青魚

鱧魚

濶口魚

鰻魚

白魚

石首魚

白鯊

鱈膠

勒魚

鱒魚

嘉魚

鮠魚

鯽魚

石斑魚

鱠殘魚

海粉

燕窩

鱸魚

鰕魚

鱧魚

鰻鱺

鱒魚

甲魚

鱒魚

鱖魚

黃頰魚

江鱗

河豚

江豚

比目魚

鮫魚

烏賊骨

鮑魚

海馬

蝦

介部

本草綱目卷一

二刻醫學初階

龜板膽汁

玳瑁

鼈甲

鼈甲

蟹

鱉

牡蠣

蚌

眞珠

石決明

文蛤

蛤蜊

蛭

魁蛤殼卽瓦楞子

車螯

貝子

石蠅

淡菜

海蠃甲煎

田蠃

寄居蟲

卽君子

禽部

鶴頂

鶴骨

鵝鵝

鶻鶻

鵝

雁

鴨

鳥

雞

雉

烏鴉

鵲

鷓鴣

鶻

鴿

鶯

雀卵

伏翼

五靈脂

斑鳩

伯勞

鸚鵡

啄木鳥

鷓鴣

鷹屎白

鷓鴣

鷓鴣

鴉

鴉鴉

鳩

獸部

豬

狗

羊

羖羊角

牛

馬

驢

駝

酪

酥

阿膠

黃明膠

牛黃

狗寶

獅油

虎骨

象皮

犀角

熊脂

熊膽

麝羊角

山羊血

鹿茸

鹿角膠

鹿胎

麋茸

麋鹿肉

麝

麝香

貓

狸

獐

兔

狐

水獺肝

山獺莖

臙膂臍

鼠

刺蝟皮

人部

髮

頭垢

乳汁

爪甲

人牙

人中黃

金汁

乾糞灰

溺

溺白塗

秋石

紅鉛

天靈蓋

人胞

胞衣水

初生臍

胎元

本經逢原卷一

清 長洲石頑張 璐路玉父纂述

男

登誕先 參訂
倬飛疇

日本 大泉長菴前田安宅子仁

再訂

男

典子守

水部

諸水 古人服藥必擇水火故凡湯液多用新汲井

華水取天真之氣浮於水面也宜文火煎成候溫煖
緩服之金匱云凡煮藥飲汁以解毒者雖云救急不
可熱飲諸毒病得熱更甚宜冷飲之此言治熱解毒
及辛熱藥味當確遵此例一切調補藥卽宜溫飲苦
寒祛火藥則宜熱飲熱因寒用之法也○仲景煎實
脾藥作甘瀾水揚之萬遍取其流利不助腎邪也○
杓楊百遍名百勞水取其激揚以除陳積也成無已
曰仲景治傷寒瘀熱在裏身黃麻黃連軹赤小豆湯

煎用潦水取其味薄不助溼熱也○以新汲水煮沸
如麻名麻沸湯取其輕浮以散結熱也○以水空煎
候熟極煮藥名清漿水取其下趨不至上涌也○服
涌吐藥用齋水取其味濁引疾上竄以吐諸痰飲宿
食酸苦涌泄爲陰也○煎蕩滌邪穢藥用東流水本
經云東流水爲雲母石所畏鍊雲母用之○煎利水
藥用急流水取性走也○煎水逆嘔吐藥用逆流水
取其上涌痰涎也○煎陽盛陰虛目不得瞑藥用千

里流水取其性之疾瀉也○煎中暑神昏藥及食楓

樹菌笑不止用地漿水急掘墻陰地作坎置水攪澄者是也取救垂絕

之陰也○煎中暑亡汗藥及霍亂泄利不止用酸漿

水糯米釀成點乳餅者或水磨作內點真粉之酸水亦可取收欲脫之陽也○

黃霉雨水洗瘡疥滅斑痕○白露雨水洗肌面滅顏

色○秋露質清止瘧除煩○臘雪氣羶助陽攝火治

天行時氣瘟疫解丹毒○雹水性暴動風發癩○夏

冰陰凝發疔成痞○栢葉菖蒲上露並能明目○韭

葉上露去白癩風○陵霄花上露能損人目○浸藍
水解毒殺蟲誤吞水蛭腹面黃者啜此水蟲下卽安
○瓶中養花水有毒傷人臘梅者尤甚○鹵水鹹苦
大毒凡蝕蠹疥癬及毒蟲生子入肉者塗之卽化但
瘡有血者不可塗之六畜食一合當時死人亦然○
生熟湯入鹽微鹹霍亂者飲一二升吐盡痰食卽愈
○方諸水大蚌水也向月取之得至陰之精華故能
明目止渴除煩湯火瘡敷之有效○上池水竹籬頭

上水也長桑君飲扁鵲能洞鑑藏府見垣一方人○
東阿井水煎烏驢皮膠治逆上之痰血○青州范公泉
造白丸子利膈化痰二者皆濟水之分流也○至若
古塚廢井澤中停水山巖泉水有翳及諸水經宿面
有五色者皆有毒非但不可服食煎藥卽洗滌亦忌
之

火部

諸火 北方炊食都用煤火以地屬坎足勝其氣且

助命門真火人食煤火長氣於陰所以膂力强壯南
人食之多發癰毒受其毒者以薑汁解之然煤火處
置大缸水於旁則毒從水解○南方炊食都用薪火
人食薪火長氣於陽氣多輕浮不實不似北方之稟
氣剛勁也○凡煎補藥文火緩煎瀉藥武火急煎煎
膏用桑柴火最良抱朴子云一切神仙藥不得桑柴
不服然不若煎收並用文火則不傷藥性○上古炊
食都用燧火是爲陽火今皆擊石取火則陰火也用

以炊食猶之可也若點艾炷尤非所宜灸艾宜取太陽真火否則真麻油燈艾莖點於炷上則灸瘡至愈不痛○神鍼火治寒溼痺附骨陰疽凡在筋骨隱痛者鍼之火氣直達病所○燔鍼卽燒鍼病在經筋所發諸痺用之其効最捷經云治在燔鍼劫刺以知爲度以痛爲愈○馬矢熅煨風痺藥取其性緩通行經絡也○葦薪火炊瀉陽藥取其輕揚不損藥力二者皆內經法也○燈火焮小兒諸驚及頭風腦痛風痺

緩急以油能解風毒火能通經絡也○燈花治小兒
邪熱在心夜啼不止以二三顆燈心湯調抹乳吮之
○燭燼治疔腫同胡麻鍼砂等分爲末和醋敷之治
九漏與陰乾馬齒莧等分爲末和臘豬脂敷之取烏
相之餘力以化歹肉也○至於菸草之火方書不錄
惟朝鮮誌見之始自閩人吸以祛瘴向後北人藉以
辟寒今則遍行寰宇豈知毒草之氣熏灼藏府遊行
經絡能無壯火散氣之慮乎近日日科內障丸中間

有用之獲効者取其辛温散冷積之翳也不可與冰
 片同吸以火濟火多發煙毒不可以藤點吸恐其有
 蛇虺之毒也吸煙之後慎不得飲火酒能引火氣熏
 灼藏府也又久受菸毒而肺胃不清者以砂糖湯解
 之菸筒中脂污衣上滌之不去惟嚼西瓜仁揉之即
 淨其滌除痰垢之力可知世以瓜子仁生痰不亦謬
 乎

土部

諸土 脾土喜燥惡溼故取東壁太陽所照之土引
眞火生發之氣補土而勝溼則吐瀉自止用以制藥
皆爲脾胃之引導耳昔人以東壁土調水治小兒嗜
食泥土之病取土入蟲口而祛之下行也○道塗中
熱土治夏月暈死取溫以散熱也若沃以冷水虛陽
立斃死不救矣○白堊土苦溫無毒本經主女子寒
熱癥瘕月閉積聚取土之間氣以祛婦人間廁之積
也千金治婦人帶下等疾者以土能勝溼而白則兼

入氣分也惟邯鄲者爲勝○黃土甘平無毒乃中央
正色不占穢漬故色不黑治泄利冷熱赤白腹內絞
痛下血解諸藥毒閉口椒毒野葶毒○蚯蚓泥治小
兒陰囊熱腫取寒能解毒也熱病讖語狂亂無燥結
可攻者蚯蚓泥涼水調服○蜚螂轉丸土治反胃吐
利霍亂湯淋絞汁飲之醋調塗項上癭瘤○土蜂窩
上細土主頭風腫毒及蜂蠆傷醋和傅之○胡燕窩
土主風瘙癢疹及惡刺瘡浸淫瘡並水和傅之小品

治溼瘍疥瘡外臺治蠹蝮尿瘡千金治癰疽丹毒○
鼠壤土通腎氣解毒邪取其搜風達竅也○蟻垤土
下胞衣死胎炒熱搗心下自出○燒尸場上土治好
魘多夢置枕中并塗關元及臍○螺螄泥主反胃吐
食取螺螄一斗水浸取泥曬乾每服一錢火酒調服
○犬屎泥治妊娠傷寒塗腹保胎○井底泥治妊娠
熱病塗胸臍丹田護子并治湯火燒瘡○伏龍肝乃
竈心赤土本經云味辛微溫主婦人崩中吐血千金

名釜月下土言正對釜臍處也然必日用炊飯者良
若煮羹者味鹹不堪入藥止欬逆吐血消癰腫毒氣
蓋以失血過多中氣必損故取微溫調和血脈也消
癰腫毒氣者辛散稟堅也日華子主催生者取溫中
而鎮重下墜也其胎漏不止產後下利並宜煮水澄
清去滓代水煎藥取溫土藏和營血也千金方治中
風口噤狂不識人並用攪水澄服又久痢不止橫生
逆產胞衣不下皆醋調塗臍腹效小兒重舌和苦酒

塗之發背酒調厚敷乾卽易平乃止杖瘡腫痛香油
調塗灸瘡腫痛煮水熱淋皆孫真人法也外臺治一
切癰腫和蒜泥貼乾再易之○百草霜燒百草之煤
也止血散瘀上下諸血悉主之又陽毒發斑取溫以
解毒散火也○金臍墨治陽毒發狂黑奴丸中用之
千金治卒中惡卒心痛舌卒腫大等患又下死胎方
用百草霜二錢伏龍肝五錢爲細末酒調童便服二
錢少頃再服三錢卽下○梁上塵一名烏龍尾治妊

娠胎動橫生逆產及金瘡鼻衄疔腫惡瘡小兒赤丹
取其輕浮以散久積之氣也○清煙墨灰止吐衄血
逆上行或生藕汁或萊菔汁或鮮地黃自然汁磨服
卽止然須燒灰出火毒用之但勿用乾地黃和水搗
磨栢葉汁甘蕉汁咸非所宜往往止截後有瘀積之
患飛絲入目及一切塵物入目磨濃墨點之自出或
燈心醮墨汁頻捲之○砂鍋取年久炊食者研細水
飛治黃腫積塊酒服五錢潞州者佳○孩兒茶一名

烏爹泥性澀收斂止血收溼爲金瘡止痛生肌之要藥○白磁器研細水飛傅癰腫可代鍼貶又點目去翳○糞坑底泥治背瘡疔腫癰毒陰乾爲末新水調敷其痛立止○坑泥同蟬蛻全蠶末作餅香油煎滾溫服以滓傅疔四圍其疔自出

金部

金 生金辛平有毒金箔無毒

發明 金能制木故可療驚癇風熱肝膽之病然須

為箔庶無重墜傷中之患紫雪方用赤金葉子煎水
取制肝降痰逆也若成塊錠金及首飾之類非特無
味且有油膩良非所宜○銀箔功用與金不殊但入
氣分不入血分稍為不同肘後方治癰腫五石湯用
之

赤銅 苦平微毒

發明 賊風反折以赤銅五觔燒紅內二斗酒中百
遍服五合日三服以効為度赤銅落乃打銅落下之

屑與自然銅同類故亦能接骨煨赤醋沃七次同五
倍等則染鬚黑潤藏器曰赤銅屑能鐸人骨及六畜
有損細研酒灌直入骨損處六畜死後取骨視之猶
有鐸痕可驗

銅青 酸苦平小毒

發明 銅青藉醋結成能入肝膽二經以醋醮搽喉
中則吐風痰爲散療喉痺牙疳醋調揩腋下治胡臭
薑汁調點爛沿風眼去疳殺蟲所治皆厥陰之病

自然銅 辛平小毒火煨醋淬七次置地七日出火
毒水飛用銅非煨不可入藥新煨者火毒燥烈慎勿
用之

發明 自然銅出銅坑中性稟堅剛散火止痛功專
接骨骨接之後即宜理氣活血庶無悍烈傷中走散
真氣之患

古文錢 辛平小毒

發明 古錢以生薑汁塗刮青點目去障消瘀散赤

腫一點卽愈但初點熱淚蔑面然終無損惟作瘡者
與肝腎虛而內障生花者不可用也婦人逆產五淋
煮汁用之便毒初起與胡桃肉同嚼食二三枚卽消
便毒屬肝金伐木也

鉛一名黑錫

甘寒無毒凡用取未經銀冶新鉛鎔淨去

渣再鎔成液同硫磺煨如焰起以醋酒之候成黑灰
研之不黏滯爲度如煨不透服之令人頭痛以陰降
太速陽火無依故也

發明 鉛稟北方癸水之性陰極之精內通於腎故
 局方黑錫丹宣明補真丹皆用之得汞交感即能治
 一切陰陽混淆上盛下虛氣升不降噎膈反胃嘔吐
 眩暈諸疾又槌成薄片置燒酒中半月許結成白霜
 取其酒徐徐飲之降陰火最捷但性帶陰毒恐傷心
 腎不可多服鉛性入肉故女子以之紉耳孔即自穿
 鉛粉一名胡粉 辛寒無毒

本經治伏尸毒螫殺三蟲

發明 鉛粉與黃丹同類內有豆粉蛤粉而無硝鹽
但入氣分功專止痛生肌亦可入膏藥代黃丹用本
經治伏尸毒螫殺三蟲者取鉛性之重以鎮攝其邪
金匱甘草粉蜜湯治虻病吐涎心痛專取胡粉殺蟲
甘草安胃蜜以誘入蟲口也陶弘景云療尸蟲彌良
鉛丹一名黃丹 辛微寒無毒

本經治吐逆胃反驚癇癩疾除熱下氣

發明 鉛丹體重性沉味兼鹽礬而走血分能墜痰

止瘧本經言止吐逆胃反治驚癇癩疾除熱下氣取其性重以鎮逆滿也仲景柴胡龍骨牡蠣湯用之取其入膽以祛痰積也但內無積滯誤服不能無傷胃奪食之患傅瘡長肉墜痰殺蟲皆鉛之本性耳目暴赤痛鉛丹蜜調貼太陽穴立効

密陀僧 鹹辛平小毒

發明 此感鉛銀硝石之氣而成其性重墜直入下焦故能墜痰截瘧療瘡腫治驚氣入心包絡瘖不能

言語者用密陀僧末一匕茶清調服卽愈驚則氣亂
取重以去怯而平肝也但入口則漾漾欲吐以陰毒
之性能傷胃氣也聖惠方鼻皴赤皰密陀僧細研人
乳調夜則塗之丹方治背瘡初起以醋煨七次桐油
調圍患處卽消同枯礬治汗癩體氣合五倍子染髭
鬚同鷹屎白滅癩痕水磨服解砒霜硫黃毒

錫 辛寒微毒

發明 錫爲砒母故新造錫器不可盛酒越宿制瓶

藏藥須舊錫雜鉛乃佳昔人過飲燒酒昏迷欲絕或
令以錫器貯沸湯蓋取氣水飲之卽甦此與炊單布
治湯氣薰灼無異同氣相感之力也

鐵落 辛寒有毒卽燒鐵赤沸砧上爆下之屑也鐵

銚內煨赤醋沃七次用

本經主風熱惡瘡瘍疽痂疥氣在皮膚中

發明 素問云有病怒狂者治以生鐵落爲飲漬汁

煎藥取其性沉下氣最疾不可過服過服令人凜凜

惡寒以其專削陽氣也本經主風熱惡瘡等疾皆肝
心火熱所致辛寒能除二經之熱也蘇恭以之炒熱
投酒中療賊風痙病借酒以行皮膚中氣也

鍼砂 酸辛無毒作鍼家磨鑪細末也

發明 鍼砂寒降善治溼熱脾勞黃病於鐵銚內煨
通紅醋沃置陰處待半月積塊生黃化盡鐵性用爲
消脾胃堅積黃腫之專藥丹溪溫中丸用之又以製
過鍼砂一兩入乾漆灰半錢香附三錢合平胃散五

錢蒸餅爲丸湯酒任下治療與溫中丸不殊

鐵精 平微溫小毒

本經明目化銅

發明 鐵之精華也出鍛竈中紫色輕如塵者佳取至陰沉重之性得純陽火鍊而輕浮上升故可以療驚悸定風癩破胃脘積血作痛本經主明目取其鎮攝虛火之義以其得火氣之多也但胃氣虛寒人服之往往有奪食發呃之虞以純陰鎮攝太過而傷犯

陽和之氣也

鐵繡

一名鐵衣

辛寒無毒

發明

陶華云鐵繡水和藥服性沉重最能墜熱開

結又能平肝消腫治惡瘡疥癬和油塗之婦人產後

陰挺不收和冰片研水傅之蠮螋蜈蚣咬和蒜塗之

石部

玉 平淡無毒

發明 玉滅癍痕日日磨擦久則自退研細水飛去

金部 鐵繡

渭南嚴氏彙

目翳珊瑚瑪瑙寶石玻璃水晶爲屑水飛皆能去翳
不獨玉屑爲然也

雲母 甘平無毒凡用選白瑩者擘薄片取雨水或
流水漬去砂土更以秋露漬數十日同露煮七日夜
磨令極細撚指無復光明者乃可用之或同鹽入重
布袋按之沃令鹽味盡懸當風處自然成粉弘景曰
鍊之用礬則揉爛忌羊血者以其能解諸藥之性也
與胡蒜尤爲切禁犯之必腹滿作瀉黑者有毒傷人

本經主身痹死肌中風寒熱如在車船上除邪氣安
五藏益精明目久服輕身延年

發明 雲母生泰山山谷色白者良本經言雲母甘
平詳其性升亦應有甘溫助陽之力故能辟一切陰
邪不正之氣主身痹死肌以其能辟除陰毒也其治
中風寒熱如在車船上以其能鎮攝虛陽也局方雲
母膏治一切癰毒仲景方治牝瘡多寒千金方治久
利帶下小便淋疾及一切惡瘡深師方治痰飲頭痛

何德揚治婦人難產温酒調服三錢入口卽下金刃
傷傳之止血最速且無腐爛之虞陰疽腸癰亦多用
之皆取助陽之力也久服能使身輕尸解孫真人恆
服之但石藥性偏助陽凡陰虛火炎者慎勿誤與
白石英 甘温無毒出泰山以六稜瑩白如水晶者
爲真林北海先生本草綱目必讀但收紫而不及白
世鮮真者可知

本經治消渴陰痿不足欬逆胸膈間久寒益氣除風溼痺

發明 白石英入手太陰足陽明氣分肺癰潰久痿痺不起者宜之本經主消渴陰痿不足諸病功專温肺無疑但石性慄悍不可久服仲景金匱風引湯只令碎如米粒不欲其滓入胃也千金五石等方俱煨過水飛入丸而五石丸專以鍾乳爲君合紫白石英赤石脂石膏專温藏氣而石膏清胃以解諸石之悍且旣經煨過水飛不慮其滓之留中蘊熱也

紫石英 甘温無毒出泰山以五稜明淨深紫大塊

者良浙產者塊小亦可入藥經火則毒生研極細水飛三次用時珍云煨赤醋淬七次水飛用非

本經主心腹欬逆邪氣補不足女子風寒在子宮絕孕十年無子

發明 紫石英入手足少陰厥陰血分上能鎮心定驚悸安竄竄攝逆氣重以去怯也下能益肝填補下焦散陰火止消渴温以煖血也女子經阻色淡不孕者宜之本經治女子風寒在子宮絕孕十年者服之

能孕非特峻補兼散濁陰留結之驗也若血熱紫黑者禁用爲其性溫也千金云婦人欲求美色者勿服紫石英令人色黑非溫血之謂乎故婦人絕孕由於陰虛火旺不能攝精者禁用

丹砂

一名硃砂

甘微寒無毒研細水飛用入火則烈毒

能殺人急以生羊血童便金汁等解之

本經主身體五藏百病養精神安魂魄益氣明目殺精魅邪惡鬼久服通神明不老能化爲汞

發明 丹砂體陽性陰外顯丹色內含真汞不熱而寒離中有坎也不苦而甘火中有土也嬰兒姤女交會於中鎮心安神是其本性用則水飛以免鎮墜不宜見火恐性飛騰本經治身體五藏百病安定神明則精氣自固火不妄炎則金木得平而魂魄自定五藏皆安精華上發而氣益目明陽明神物故應辟除不祥消散陰惡殺厲之氣仲淳繆子經疏之言也同遠志龍骨則養心氣同當歸丹參則養心血以人參

茯神濃煎調入丹砂治離魂病以丹砂末一錢和生
雞子黃三枚攪勻頓服治妊娠胎動不安胎死卽出
未死卽安又以丹砂一兩爲末取飛淨三錢於一時
頃分三次酒服治子死腹中立出慎勿經火若經伏
火及一切烹煉則毒等於砒礪惟養正丹則同鉛汞
硫黃煨之以汞善走而火毒不致蘊發也

銀硃 辛溫有毒忌一切血

發明 水銀和硫黃煨煉成硃轉媾爲嬰故專殺蟲

治瘡以毒攻毒而已今食品往往用之良非所宜觀其同蟹殼燒之則臭蟲絕跡和棗肉薰之則瘡疥頓枯其性悍烈可知

水銀

一名汞

辛寒有毒水銀陰毒重著不可入人腹

古法治誤食水銀令其人臥於椒上則椒內皆含水銀今有誤食水銀腹中重墜用豬脂二觔切作小塊焙熟入生蜜拌食得下亦一法也

本經主疹癩痂瘍白禿殺皮膚中蝨墮胎除熱殺金

銀銅錫毒鎔化還復爲丹

發明 水銀乃至陰之精質重著而性流利得鹽礬

爲輕粉加硫黃爲銀硃煬成罐同硫黃打火升鍊則
爲靈砂同硝皂等則爲升降靈藥性之飛騰靈變無
似之者此應變之兵在用者得其肯綮而執其樞要
焉本經主疹瘍白禿皮膚中蝨及墮胎除熱傳男子
陰則陰消無氣以至陰之精能消陽氣故不利男子
陰氣也和劑局方之靈砂丹專取硫黃以制汞養正

丹兼取伏火丹砂以製鉛深得交通陰陽既濟水火
 之妙用非尋常草木可以例推也千金治白癩風癢
 外臺治蟲癬瘙癢梅師治痔瘡作痒肘後治一切惡
 瘡藏器有云水銀入耳能蝕人腦令人百節攣縮但
 以金銀著耳邊卽出頭瘡切不可用恐入經絡必緩
 筋骨百藥不治

輕粉

一名賦粉

辛燥有毒

發明

水銀加鹽礬鍊爲輕粉化純陰爲燥烈而陰

毒之性猶存故能通大腸傅小兒疳疽癰癩殺瘡疥
癬蟲風瘙瘡癢但以陰性暴悍善劫淫穢黷瘡食之
竄入筋骨莫之能出久久發爲結毒致成廢人然必
仍用水銀昇鍊入三白丹引拔毒之藥同氣相求以
搜逐之癘風醉仙丹通天再造散用以搜滌毒邪從
齒縫出錢氏利驚丸白餅子皆用之取痰積從大便
出真瞑眩之首推也

靈砂 甘溫無毒

按胡演丹藥祕訣云昇靈砂法用新鍋安道遙鑪上
蜜揩鍋底文火下燒入硫黃二兩鎔化投水銀八兩
以鐵匙急攪作青砂頭如有焰起噴醋解之待永不
見星取出細研盛入水火鼎內鹽泥固濟下以自然
火升之乾水十二盞爲度取出如束鍼紋者成矣庚
辛玉冊云靈砂有三以一伏時周天火而成者謂之
金鼎靈砂以九度抽添用周天火而成者謂之九轉
靈砂以地數三十日炒鍊而成者謂之老火靈砂並

宜桑灰淋醋煮伏過用之於硃砂中鍊出者謂之眞
汞尤爲神効

發明 時珍曰此以至陽鈞至陰脫陰反陽故曰靈
砂爲扶危拯急之靈丹虛陽上逆痰涎壅盛頭眩吐
逆喘不得臥寤不得寐霍亂反胃心腹冷痛尤爲鎮
墜虛火之專藥但不可久服凡胃虛嘔吐傷暑霍亂
心肺熱鬱禁用

雄黃 辛苦溫微毒武都者良入香油熬化或米醋

入蘿蔔汁煮乾用生則有毒傷人

本經主寒熱鼠瘻惡瘡疽痔死肌殺精物惡鬼邪氣
百蟲毒勝五兵

發明 雄黃生山之陽純陽之精入足陽明經得陽
氣之正能破陰邪殺百蟲辟百邪故本經所主皆陰
邪濁惡之病勝五兵者功倍五毒之藥也其治驚癇
痰涎及射工沙蟲毒與大蒜合搗塗之同硝石煮服
立吐腹中毒蟲千金方治疗腫惡瘡先刺四邊及中

心以雄黃末傅之聖惠方治傷寒狐惑以雄黃燒於
瓶中熏其下部和劑局方酒癥丸同蠍尾巴豆治酒
積痛利肘後方以雄黃礬石甘草湯煮治陰腫如斗
經驗方以雄黃白芷爲末酒煎治破傷風腫家秘方
以雄黃細研神麴糊丸空心酒下四五分日服無間
專消瘡母急救良方以雄黃五錢麝香二錢爲末作
二服酒下治風狗咬傷外臺秘要雄黃敷藥箭毒攝
生妙用雄黃硫黃棗豆粉人乳調敷酒皸鼻赤不過

三五次愈痘疹證治以雄黃一錢紫草三錢爲末
脂汁調先以銀簪挑破搽痘疔萬氏方治壅瘍漫腫
色不嫩赤明雄黃細末三分雞子破殼調入飯上蒸
熟食之重者不過三枚卽消聖濟錄以雄黃豬膽汁
調敷白禿頭瘡○熏黃治惡瘡疥癬殺蟲蝨和諸藥
熏嗽千金方有欬熏法

雌黃 辛平有毒

本經主惡瘡頭禿痂疥殺毒蟲蝨身癢邪氣諸毒

發明 雌黃出山之陰故單治瘡殺蟲而不能治驚
癩痰疾本經治惡瘡頭禿痂疥與雄黃之治寒熱鼠
瘦迥乎陰陽之分矣其殺毒蟲蝨身癢較雄黃之殺
精物惡鬼邪氣解毒辟惡之性則一而功用懸殊治
狂癡勝金丹用之不過借爲搜陰邪之嚮導耳別錄
治鼻中瘕肉不宜久服令人腦漏

石膏 辛甘大寒無毒清胃熱煨用治中暍熱生用
一種微硬有肌理名理石主治與粗理黃石相類

石部 雌黃 石膏

渭南嚴氏彙

本經主中風寒熱心下逆氣驚喘口乾舌焦不能息
腹中堅痛除邪鬼產乳金瘡

發明 古人以石膏葛根並爲解利陽明經藥蓋石
膏性寒葛根性溫功用詎可不辯葛根乃陽明經解
肌散寒之藥石膏爲陽明經辛涼解熱之藥專治熱
病喝病大渴引飲自汗頭痛溺瀆便閉齒浮面腫之
熱證仲景白虎湯是也東垣云立夏前服白虎令人
小便不禁降令大過也今人以此湯治冬月傷寒之

陽明證服之未有得安者不特石膏之性寒且有知
母引邪入犯少陰非越脾大青龍小續命中石膏佐
麻黃化熱之比先哲有云凡病雖有壯熱而無煩渴
者知不在陽明切勿誤與白虎本經治中風寒熱是
熱極生風之象邪火上衝則心下有逆氣及驚喘陽
明之邪熱甚則口乾舌焦不能息邪熱結於腹中則
堅痛邪熱不散則神昏譫語等乎邪鬼解肌散熱外
泄則諸證自退矣卽產乳金瘡亦是鬱熱蘊毒赤腫

神昏故可用辛涼以解泄之非產乳金瘡可泛用也
其金匱越脾湯治風水惡寒無大熱身腫自汗不渴
以麻黃發越水氣使之從表而散石膏化導胃熱使
之從胃而解如大青龍小續命等製又不當以此執
泥也至於三黃石膏湯又以伊尹三黃河間解毒加
入石膏麻黃香豉薑葱全以麻黃開發伏氣石膏化
導鬱熱使之從外而解蓋三黃石膏之有麻黃越脾
青龍續命之有石膏白虎之加桂枝加蒼朮加人參

加竹葉麥門冬皆因勢利導之捷法千金五石丸等
方用以解鍾乳紫白石英石脂之熱性耳別錄治時
氣頭痛身熱三焦大熱皮膚熱腸胃中熱氣解肌發
汗止消渴煩逆腹脹暴氣喘息咽熱者以諸病皆由
足陽明胃經邪熱熾盛所致惟喘息畧兼手太陰病
此藥能散陽明之邪熱陽明熱邪下降則太陰肺氣
自虛故悉主之○粗理黃石破積聚去三蟲千金鍊
石散醋煨水飛同白欵鹿角治石癰以火鍼鍼破傅

之

滑石 甘寒無毒色青赤者有毒

本經主身熱洩瀉女子乳難癰閉利小便蕩胃中積聚寒熱益精氣

發明 滑石利竅不獨利小便也上能散表下利水道爲蕩熱散溼通利六府九竅之專劑取甘淡之味以清肺胃之氣下達膀胱也詳本經諸治皆清熱利竅之義河間益元散通治表裏上下諸熱解時氣則

以葱豉湯下催生則以香油漿水調服暑傷心包則以本方加辰砂末一分使熱從手足太陽而泄也惟元氣下陷小便清利及精滑者勿服久病陰精不足內熱以致小水短少赤澀雖有泄瀉皆爲切禁而本經又言益精氣者言邪熱去而精氣自復也

赤石脂 甘酸辛溫無毒五色石脂並溫無毒

本經養心氣明目益精療腹痛腸澼下痢赤白小便利及癰疽瘡痔女子崩中漏下產難胞衣不出

發明 赤石脂功專止血固下仲景桃花湯治下利
便膿血者取石脂之重漚入下焦血分而固脫乾薑
之辛溫煖下焦氣分而補虛粳米之甘溫佐石脂而
固腸胃也火熱暴注初痢有積熱者勿用本經養心
氣明目益精是指精血脫泄之病而言用以固斂其
脫則目明精益矣療腹痛腸澼等疾以其開泄無度
日久不止故取漚以固之也治產難胞衣不出乃指
日久去血過多無力逆下故取重以鎮之也東垣所

謂胞衣不出瀉劑可以下之設血氣壅滯而胞衣不出又非石脂所宜也其白者斂肺氣澀大腸金匱風引湯用之專取以杜虛風復入之路也青者入肝黃者入脾黑者入腎總取治崩利水之功各隨其色而用之

爐甘石 甘溫無毒

發明 爐甘石得金銀之氣而成專入陽明經而燥溼熱目病爲要藥時珍常用爐甘石煨飛海螵蛸礪

砂等分爲細末點諸目疾皆妙又煨過水飛丸如彈
圓多攢簪孔燒赤煎黃連汁淬數次點眼皮溼爛及陰
囊腫溼其功最捷

無名異 甘平無毒

本經主金瘡折傷內損止痛生肌肉

發明 無名異本經主折傷內損今人治打傷腫痛
損傷接骨又試効方臨杖預用酒服三五錢則杖不
甚傷蘇頌醋磨傅腫毒者亦取活血涼血之功耳

石鍾乳 甘溫無毒以甘草紫貝天葵同煮一伏時
杵粉入鉢細研水飛澄過再研萬遍磁器收之若不
經煨煉服之令人淋

本經主欬逆上氣明目益精安五藏通百節利九竅
下乳汁

發明 鍾乳乃山靈陽氣所鍾故瑩白中空純陽通
達專走陽明氣分若質實色渝必生陰壑不無蛇虺
之毒誤餌傷人惟產乳源形如鵝鴿管者最勝然性

偏助陽陰虛之人慎毋輕服內經云石藥之氣悍服之令陽氣暴充形體壯盛昧者得此自慶益肆淫泆精氣暗損石氣獨存孤陽愈熾久之榮衛不從發爲淋濁及爲癰疽是果乳石之過歟抑人之自取耶惟肺氣虛寒欬逆上氣哮喘痰清下虛脚弱陰痿不起大腸冷滑精泄不禁等疾功效無出其右本經主欬逆上氣者取其性溫而鎮墜之則氣得歸元而病自愈五藏安則精自益目自明其通百節利九竅下乳

汗者皆取甘溫助陽色白利竅之力也昔人言鍾乳
與白朮相反而千金方每多並用專取相反之性激
其非常之効予常親試未嘗有害孔公孽孔竅中通
附垂於石如木之孽卽鍾乳之牀本經利九竅下乳
汁之功與鍾乳無異而殷孽卽孔公孽之根又爲瘡
疽瘦痔癥瘕溫散結氣之用惜乎世鮮知者

石灰 辛溫有毒

本經主疽瘍疥瘙熱氣惡瘡癩疾死肌墮眉殺痔蟲

去黑子瘰肉

發明 石灰稟壯火之餘烈故能辟除陰邪溼毒觀
本經所主疽瘍疥瘙熱氣惡瘡癩疾死肌等皆外治
之用去黑子者火氣未散性能灼物故能去黑子瘰
肉及墮眉也本經雖不言有毒而內服之方從無及
此其毒可知寇氏治中風口喎以石灰醋炒調塗左
塗右右塗左立便牽正千金治身面疣用苦酒浸石
灰六七日取汁頻頻滴之自落又治溺死之人用化

過細灰裏下部以滲其水卽活又治癭瘡不合古塚
中石灰厚傅之集玄方治面廩疣痣碱水煮滾化礮
灰插糯米半入灰中經宿色變如晶以鍼微撥動點
少許於上半日汁出剔去藥不得著水二日卽愈便
簡方治疔腮腫痛醋調陳年石灰傅之肘後方治湯
火傷灼年久石灰油調傅之又治刀刃金瘡石灰裏
之卽痛定血止但不可著水著水卽爛肉也

浮石

一名海石

鹹平無毒煨過水飛用

發明 海石乃水沫結成色白體輕故治上焦痰熱
 止欬點目翳傳痘癰功效最捷又治諸淋散積塊皆
 取鹹能軟堅之意消癭瘤結核疝氣然惟實證宜之
 虛者誤投患亦最速以其性專剋削肺胃之氣也南
 海有浮水之石沉水之香專取物類之相反以治病
 氣之阻逆也

陽起石 本經名白石

鹹溫無毒色白揉之如綿不脆者

真質堅脆者即偽煨過燒酒淬七次杵細水飛用

本經主崩中漏下破子藏中血癥瘕結氣寒熱腹痛
無子陰痿不起補不足

發明 陽起石乃雲母之根右腎命門藥下焦虛寒
者宜之黑錫丹用此正以補命門陽氣不足也本經
治崩中漏下陽衰不能統攝陰血也又言破子藏中
血癥瘕結氣是指陰邪畜積而言用陽起石之鹹溫
散其所結則子藏安和孕自成矣陰虛火旺者忌用
以其性專助陽也

慈石

本經名玄石俗名煖鐵石

辛鹹微寒無毒入藥煨過醋淬

七次研細水飛用

本經主周痺風溼肢節中痛不可持物洗洗酸消除
大熱煩滿及耳聾

發明 慈石爲鐵之母腎與命門藥也惟其慈故能
引鐵千金慈硃丸治陰虛龍火上炎耳鳴嘈嘈腎虛
瞳神散大蓋慈石入腎鎮養眞精使神水不外移硃
砂入心鎮養心血使邪火不上浸耳目皆受蔭矣本

經主周痺風溼肢節中痛洗洗酸消取辛以通痺而祛散之重以去怯而鎮固之則陰邪退聽而肢節安和耳目精明大熱煩滿自除矣濟生方治腎虛耳聾以慈石豆大一塊同煨穿山甲末綿裏塞耳中口含生鐵一塊覺耳中如風雨聲卽通

代赭石

本經名須丸

苦甘平無毒擊碎有乳形者真火

煨醋淬三次研細水飛用

本經主鬼疰賊風蠱毒腹中毒邪女子赤沃漏下

發明 赭石之重以鎮逆氣入肝與心包絡二經血
 分本經治賊風蠱毒赤沃漏下取其能收斂血氣也
 仲景治傷寒吐下後心下痞硬噫氣不除旋復代赭
 石湯取重以降逆氣滌涎痰也觀本經所治皆屬實
 邪卽赤沃漏下亦是肝心二經瘀滯之患其治難產
 胞衣不下及大人小兒驚氣入腹取重以鎮之也陽
 虛陰痿下部虛寒忌之以其沉降而乏生發之功也
 禹餘糧 本經名白餘糧與太
 乙餘糧功用皆同 甘平無毒細研水淘

澄之勿令有砂土

本經主欬逆寒熱煩滿下痢赤白血閉癥瘕大熱鍊餌服之不饑輕身延年

發明 重可以去怯禹餘糧之重爲鎮固之劑手足陽明血分藥其味甘故治欬逆寒熱煩滿之病其性澀故主赤白帶下前後諸病仲景治傷寒下利不止心下痞鞭利在下焦赤石脂禹餘糧丸主之取重以鎮痞逆瀉以固脫泄也抱朴子云禹餘糧丸日再服

三日後令人多氣力負擔遠行身輕不饑卽本經輕身延年之謂

空青 甘酸大寒無毒

本經主青盲耳聾明目利九竅通血脈養精神益肝氣久服輕身延年

發明 空青感銅之精氣而結故專入肝明目本經主耳目九竅諸病皆通血脈養精神益肝氣之力也久服輕身延年者銅性善滌垢穢垢穢去而氣血清

純毋伐天和矣時珍曰空青與綠青皆生益州及越
騫山有銅處東方甲乙是生肝膽其氣之清者爲肝
血其精英爲膽汁開竅於目血者五藏之英皆因而
注之爲神膽汁充則目明減則目昏銅亦青陽之氣
所生其氣之清者爲綠猶肝血也其精英爲空青之
漿猶膽汁也其爲治目神藥蓋亦以類相感耳但世
罕得真醫亦罕識以故俗諺云天下有空青人間無
瞽目之說不知此雖貴品銅官始興涼州高平饒信

等處亦皆有之出銅坎者銅質隱隱內涵空綠生金
穴者金星粲粲內涵空青總取得肝膽之精靈通空
竅之風氣也予嘗以此驗之攷之張果玉洞要訣云
空青似楊梅受赤金之精甲乙陰靈之氣近泉而生
故能含潤然必新從坎中出者則鑽破中有水若出
礦日久則乾如珠矣安有藏久不乾之理近世必以
中空涵漿者爲真若爾則當名空漿不當名空青矣
但須驗其中空內有青綠如珠者卽真空青急不可

得綠青可以代用活法在人可執一乎

曾青

曾音層其青層層而生故石形如蚯蚓屎者真

酸小寒無毒

本經主目痛止淚出風痺利關節通九竅破癥堅三積聚久服輕身不老

發明

曾青治目義同空青以其並出銅礦與綠青

同一根源曾青則綠青之祖氣也古方太乙神精丹用之扁鵲治積聚留飲有曾青丸並見古今錄驗方曾空二青近世絕罕千金云當取崑崙綠代之卽綠

青也

綠青

俗名石綠

微酸小毒

發明

痰在上宜吐之在下宜利之綠青吐風痰眩

悶取二三錢同龍腦少許調勻以生薄荷汁合酒溫

服便臥涎自口角流出乃愈不嘔吐而功速故著之

扁青

俗名石青

甘平無毒

本經主目痛明目折跌癰腫金瘡不瘳破積聚解毒

氣利精神

發明 石青走肝磨堅積故本經所主皆肝經積聚
之病時珍用吐風痰研細溫水灌下卽吐肝虛易驚
多痰者宜之形如縮砂者名魚目青主治與扁青無
異

石膽

俗名
膽礬

酸辛寒有毒產秦州嵩岳及蒲州中條
山出銅處有之能化五金以之制汞則與金無異

本經主目痛金瘡諸癩瘰女子陰蝕痛石淋寒熱崩
中下血諸邪毒氣

發明 石膽酸辛氣寒入少陽膽經性寒收斂味辛
上行能涌風熱涎痰發散風木相火又能殺蟲本經
主目痛金瘡癰瘰取酸辛以散風熱痰垢也治陰蝕
崩淋寒熱取酸寒以滌溼熱淫火也又爲咽齒喉痺
乳蛾諸邪毒氣要藥涌吐風痰最快方用米醋煮眞
鵝嘴膽礬末醋調探吐膠痰卽瘥又治紫白癩風膽
礬牡蠣粉生研醋調摩之風犬咬傷膽礬末水服探
吐蜜調傅之立愈胃脘蟲痛茶清調膽礬末吐之走

馬牙疳紅棗去核入膽礬煨赤研末傅之追出痰涎
卽愈百蟲入耳膽礬和醋灌之卽出千金方也

礬石 辛熱有毒久服令人筋攣煨法以黃泥包炭
火燒一日一夕乃可用之惡羊血不入湯液

本經主寒熱鼠瘻蝕死肌風痺腹中堅癖邪氣

發明 時珍云礬石與砒石相近性亦相類但砒石
畧帶黃暈礬石全白稍有分辨而古方礬石與礬石
常相渾書二字相似故誤耳然礬石性寒無毒礬石

性熱有毒不可不審甄權除膈間積氣冷溼風痺瘙癢積十年者仲景云生用破人心肝嚴冬以此置水中則水不冰其熱毒之性不減砒石今藥肆中往往以充砒石而礬石僅可破積攻痺不能開痰散結是以勝金丹截瘡丹服之不効者良由誤用礬石之故按王子敬靜息帖言礬石深是可疑凡喜服寒食散者輒發癰毒故云深可疑也以其毒烈乾汞最速故丹房目爲仙藥凡山中有礬則春不生草冬不積雪

而鼠食則斃蠶食則肥物類之宜忌有不可解者其
特生礬石有蒼白紫桃花色金星銀星等類其毒不
異惟出金穴中者名握雪礬石雖溫無毒與上迥然
不同

砒石 出信州故
又名信石

苦辛大熱大毒色白有黃暈者名

金脚砒鍊過者曰砒霜色紅者最劣不堪入藥畏菜
豆芽茶冷水入藥醋煮用或與芽茶同用或與浸溼
生菜豆仁同研以殺其毒中其毒者以生羊血解之

冷水多灌亦解若犯火酒必不可救

發明 砒霜瘡家常用入口則吐利兼作吐後大渴則與菜豆湯飲之砒性大毒誤食必死奈何以必死之藥治必不死之病豈不殆哉然狂癡之病又所必需勝金丹用之無不應者枯痔散與天靈蓋同用七日痔枯自落取熱毒之性以枯歹肉天靈蓋以透骨髓散宿垢長肌肉也

礞石 辛鹹平無毒色青者入肝力勝色黃者兼脾

次之硝石煨過杵細水飛用

發明 青礞石厥陰之藥其性下行治風木太過挾
制脾土氣不運化積滯生痰壅塞膈上變生風熱諸
病故宜此藥重墜以下泄之使木平氣下而痰積通
利諸證自除矣今人以王隱君滾痰丸通治諸痰怪
證不論虛實寒熱槩用殊爲未妥不知痰因脾胃不
能運化積滯而生膠固稠粘者誠爲合劑設因陰虛
火炎煎熬津液凝結成痰如誤投之則陰氣愈虛陽

火彌熾痰熱未除而脾胃先為之敗矣況乎脾胃虛寒食少便溏者得之泄利不止禍不旋踵若小兒多變慢脾風證每致不救可不慎歟

花乳石

一名花藥石

酸辛溫無毒出陝華諸郡色黃中

有淡白點以此得名又代州山谷中有五色者制法以花乳石五兩同硫黃二兩入煬成罐內鹽泥固濟加頂火煨過研細水飛用

發明 花乳石產硫黃山中其性大溫厥陰血分藥

也葛可久治虛勞吐血有花蘘石散以其性溫善散
瘀結也和劑局方治金刃箭傷打撲垂死外有損處
以煨過細末摻傷處血化黃水再摻卽活如內有損
血入藏府煎童子小便入酒少許調灌一錢七立効
婦人產後惡血衝心昏暈不省或胎死腹中胞衣不
下致死但心胸溫暖者急以童便調灌一錢取下惡
血卽安若膈上有血化爲黃水卽時吐出或隨小便
出甚効但陰虛火炎中無瘀積者誤用必殆

河沙 微寒無毒

發明 河沙得水土之氣故夏月發癰子通石淋主

絞腸沙痛用沙炒熱冷水淬之澄清服效又風溼頑

痺不仁筋骨攣縮六月取河沙曝熱伏坐其中冷即

易之取微汗忌風冷勞役不過數次愈其玉田沙夏

月發痲疹良

石燕 甘寒無毒

發明 石燕出祁陽西北江畔砂灘上形似蚪而小

堅重於石俗云因雷雨則自石穴中出隨雨飛墮者
妄也其性寒涼乃利竅行溼熱之物故能療眼目障
翳磨水不時點之熱淋煮汁飲之婦人難產兩手各
執一枚卽下然不若磨汁飲之更似有理

石蟹 甘寒無毒

發明 石蟹生南海近海州郡皆有之體質石也與
蟹相似或言崖州榆林港內土極細最寒蟹入不能
運動片時成石亦妄言也其性鹹寒質堅能磨翳積

故青盲目淫膚翳丁翳漆瘡皆水磨點塗催生下胎療
熱結血暈熱水磨服

蛇黃 温微毒

發明 蛇黃生蛇腹中如牛黃之類世人因其難得

遂以蛇含石醋煨水飛代之取蛇之性竄入肝也蛇

含石入手足厥陰血分與代赭之性不甚相遠為小

兒鎮攝驚癇之重劑脾風泄瀉者宜之

霹靂礮 即雷 温無毒

礮

發明 雷楔稟東南水火之氣治小兒驚癇磨汁服
之作枕辟惡夢不祥鎮邪瘧刮屑殺瘵蟲下蠱毒置
箱簣不生蛀蟲佩之安神治驚邪之疾

鹵石部

食鹽 鹹寒無毒

本經主結熱喘逆胸中病令人吐

發明 鹹走腎走血腎病血病人無多食鹽以血得
鹹則凝也補腎藥用之不過借爲引導耳乾霍亂及

臭毒頭痛腹痛多用鹽水吐之本經所主結熱喘逆者以鹹能下氣過鹹則引涎水聚於膈上而涌之也好食鹹者人多黑色耗血之驗也病水腫忌食以其走腎助邪水之逆滿也千金治妊婦橫生逆產先露手足以鹽摩產婦腹并塗兒手足急以爪搔之卽縮入而正產又殺蠱毒凡水蛭蚯蚓得鹽卽化爲水毒蟲螫者以鹽擦之其毒卽解鹽之味鹹性降下氣最速治下部蠹瘡吐胸中痰澀止心腹卒痛不可多食

傷肺喜欬扁鵲云能除一切大風痛炒熱熨之今人

救朱魚噎雷電暴雨欲死但口微動者速將鹽少許

調水貯魚於中時時微動其水即活鱗尾有損處以

鹽塗之即生出鹽為水之精專得涵養之力也今人

食暴雨潦水腹脹以鹽湯探吐即安其解水毒可知

戎鹽

一名石鹽俗名青鹽與光明鹽同類

鹹寒無毒

本經主明目目痛益氣堅筋骨去毒蠱

發明 戎鹽稟至陰之氣凝結而成不經煎鍊生涯

涖之陰功專走血入腎治目中瘀赤昏澁金匱茯苓
 戎鹽湯治小便不通取其補腎利膀胱也又能固齒
 明目治目痛益氣堅筋骨一皆補腎之力本經首主
 明目目痛是熱淫於內治以鹹寒又言去毒蠱者鹹
 能奠堅蠱毒邪氣不能浮長矣

鹵鹼

一名石鹼

苦鹹微寒無毒

本經主大熱消渴狂煩除邪及下蠱毒柔肌膚

發明

鹼味鹹性走故能消痰磨積祛熱煩蠱毒消

渴屬實熱者宜之肌膚粗者以湯洗之頑皮漸退是
卽柔肌膚之謂也○水鹼乃竈灰淋湯沖銀黝脚所
造性能發麪故麪舖中無不用之病人食之多發浮
腫故方後每忌溼麪觀其善絛衣垢剋削可知

凝水石

卽寒水石

辛鹹寒無毒近世眞者絕不易得欲

驗眞僞含之卽化爲水否卽是僞石膏亦名寒水石
與此不同

本經主身熱腹中積聚邪氣皮中如火燒煩滿

發明 寒水石生積鹽之下得陰凝之氣而成鹽之精也治心腎積熱之上藥本經治腹中積聚鹹能軟堅也身熱皮中如火燒鹹能降火也金匱風引湯局方紫雪皆用以治有餘之邪熱也如無真者戎鹽玄精石皆可代用總取鹹寒降泄之用耳

玄精石 辛鹹寒無毒青白龜背者良

本經除風冷邪氣溼痺益精氣

發明 玄精石稟太陰之精與鹽同性故其形皆六

出象老陰之數也本經言味鹹氣溫傳寫之誤其氣寒而不溫其味辛鹹沉降同硫黃硝石治上盛下虛收陽助陰有扶危拯逆之功來復丹用之專取一陽來復之義寒因寒用深得本經諸治之奧

朴消 辛苦鹹寒有毒黃者傷人赤者殺人入藥必取白者以水煎化澄去滓入萊菔自然汁同煮傾入盆中經宿結成如冰謂之盆消齊衛之消上生鋒芒謂之芒消川晉之消上生六稜謂之牙消取芒消再

三以萊菔汁煉去鹹味懸當風處吹去水氣輕白如粉謂之風化消以芒消牙消同萊菔汁甘草煎過鼎罐昇煨謂之立明粉

本經主五藏積熱胃脹閉滲蓄結飲食推陳致新除

邪氣

向錯簡在消石條內今正之詳治五藏等證皆熱邪固積決非硝石所能

發明 熱淫於內治以鹹寒堅者以鹹寒之熱者以

寒消之不出本經推陳致新之妙用仲景大陷胸湯

大承氣湯調胃承氣湯皆用芒消稟堅去實且帶微

辛所以走而不守若熱結不至堅者不可輕用小兒赤遊風以消傾湯中取布蘸溼拭之

玄明粉

御藥院方
名白龍粉

辛甘微寒無毒

發明 玄明粉用芒消煨過多遍佐以甘草緩其鹹寒之性用治膈上熱痰胃中實熱腸中宿垢非若芒消之力峻傷血也然脾胃虛寒及陰虛火動者慎勿輕用以取虛虛之咎

風化消

甘鹹寒無毒

發明 風化消甘緩輕浮故治上焦心肺痰熱而不
 致於泄利者宜之并治經絡之痰溼但重著而非痰
 痛者用之有效指迷茯苓丸治痰溼流於肩背之陽
 位而隱隱作痛最為合劑然惟體肥氣實者為宜眼
 瞼赤腫和人乳點之

硝石 即焰硝

辛苦鹹温有毒溶化投甘草結定取用

本經主百病除寒熱邪氣逐六府積聚結固留癖能

化七十二種石

諸家本草皆錯簡在朴硝條內
 詳化七十二種石豈朴硝能之

發明 焰硝屬火其性上升能破積散堅治諸寒熱
交錯之病升散三焦火鬱調和藏府虛寒除寒熱邪
氣逐六府積熱不出本經主治也別錄言天地至神
之物能化七十二種石抱朴子亦云能消柔五金化
七十二石其錯簡可知與硫黃同用卽配偶二炁均
調陰陽有升降水火之功治冷熱緩急之病蓋硫黃
性煖而利其性下行硝石性煖而散其性上行一升
一降此制方之妙也

硃砂 鹹苦辛熱有毒醋煮乾刮下用番禺者良畏
酸漿水忌羊血中其毒者生棗豆研汁恣飲解之
發明 硃砂大熱乃鹵液所結秉陰毒之氣含陽毒
之精破積攻堅無出其右故能治噎膈反胃積塊肉
癥其性能柔金銀故錐藥用之所言化人心爲血者
甚言其迅利也外用治惡肉除疣贅去鼻中瘰肉最
捷但不可過用用過急以甘草湯洗之觀金銀有僞
投硃砂罐中悉能消去沉人腹中有久積死胎豈不

腐潰但其性毒烈苟有生機慎勿輕試

蓬砂

一名鵬砂

甘微鹹無毒甘草湯煮化微火炒鬆用

發明

蓬砂味甘微鹹氣溫色白而質輕能去胸膈

上焦之實熱素問云熱淫於內治以鹹寒以甘緩之是也其性能柔五金而去垢膩故主痰嗽喉痹破癥結治噎膈積聚骨鯁結核惡肉取其能柔物也含化嚙津治喉中腫痛膈上痰熱取其能散腫也眼目障翳口齒諸病用之取其能滌垢也昔人治骨鯁百計

不下取含嚙汁脫然如失此軟堅之徵也

石硫黃 酸鹹大熱有毒以萊菔挖空入硫黃蒸熟

用或入豆腐中煮七次用或醋煨用或豬藏中制用

各隨本方硫是礬之液礬是鐵之精磁石是鐵之母

故鍼砂磁石制入硫黃立成紫粉硫能乾汞見五金

而黑得水銀則赤也

本經主婦人陰蝕疽痔惡血堅筋骨除頭禿

發明 硫黃稟純陽之精賦大熱之性助命門相火

不足寒鬱火邪胃脘結痛脚冷疼弱者宜之其性雖熱而能疎利大腸與燥澀之性不同但久服傷陰大腸受傷多致便血傷寒陰毒爪甲純青火焰散屢奏神功陰水腹脹水道不通金液丹服之卽效本經治陰蝕疽痔乃熱因熱用以散陰中蘊積之垢熱但熱邪亢盛者禁用又言堅筋骨者取以治下部之寒溼若溼熱痿痺良非所宜人身陰常不足陽常有餘苟非眞病虛寒胡可服此毒熱類按有久服硫黃人漸

縮小之例石頑親見李堯占服此數年臨斃縮小如七八歲童子狀正內經所謂熱則骨消筋緩是也

礬石

酸澀微寒無毒明如鵬砂起橫樞者名馬齒

礬最勝生用煨用各隨本方生者多食破人心肺

本經主寒熱洩利白沃陰蝕惡瘡目痛堅骨齒

發明

白礬專收溼熱固虛脫故本經主寒熱泄利

蓋指利久不止虛脫滑泄因發寒熱而言其治白沃陰蝕惡瘡專取滌垢之用用以洗之則治目痛漱之

則堅骨齒弘景曰經云堅骨齒誠爲可疑以其性專
入骨多用則損齒少用則堅齒齒乃骨之餘也爲末
去鼻中瘰肉其治氣分之痰溼癰腫最捷侯氏黑散
用之使藥積腹中以助悠久之功故蠟礬丸以之爲
君有人遍身生瘡如蛇頭服此而愈甄權生含嚙津
治急喉痺皆取以去穢之功也若溼熱方熾積滯正
多誤用收瀆爲害不一岐伯言久服傷人骨凡陰虛
咽痛誤認喉風陰冷腹痛誤認臭毒而用礬石必殆

綠礬一名皂礬

酸寒無毒

發明 皂礬專除垢膩同蒼朮酒麴醋丸治心腹中

滿或黃腫如土色甚効蓋礬色綠味酸燒之則赤用

以破血分之瘀積其効最速金匱治女勞黑痺硝石

礬石丸專取皂礬以破瘀積之血緣其未經註明嘗

有誤用白礬瀝收殊昧此理又婦人白沃經水不利

子藏堅癖中有乾血白物用礬紅杏仁蜜丸納陰中

日一易之

山草部

甘草

一名國老

甘平無毒反海藻大戟甘遂芫花補中

散表炙用瀉火解毒生用中心黑者有毒勿用

本經主五藏六府寒熱邪氣堅筋骨長肌肉倍氣力
解金瘡腫毒

發明 甘草氣薄味厚升降陰陽大緩諸火生用則

氣平調脾胃虛熱大瀉心火解癰腫金瘡諸毒炙之
則氣溫補三焦元氣治藏府寒熱而散表邪去咽痛

緩正氣養陰血長肌肉堅筋骨能和衝脈之逆緩帶脈之急凡心火乘脾腹中急痛腹皮急縮者宜倍用之其性能緩急而又協和諸藥故熱藥用之緩其熱寒藥用之緩其寒寒熱相兼者用之得其平本經治藏府寒熱邪氣總不出調和胃氣之義仲景附子理中用甘草恐僭上也調胃承氣用甘草恐速下也皆緩之意小柴胡有黃芩之寒人參半夏之溫而用甘草則有調和之意炙甘草湯治傷寒脈結代心動

悸渾是表裏津血不調故用甘草以和諸藥之性而復其脈深得攻補兼該之妙用惟土實脹滿者禁用而脾虛脹滿者必用蓋脾溫則健運也世俗不辨虛實一見脹滿便禁甘草何不思之甚耶凡中滿嘔吐諸溼腫滿酒客之病不喜其甘藻戟遂藘與之相反亦迂緩不可救昏昧耳而胡洽治痰癖以十棗湯加甘草大戟乃痰在膈上欲令通泄以拔病根也古方有相惡相反並用非妙達精微者不知此理其稍去

莖中痛節解癰疽毒條草生用解百藥毒凡毒遇土則化甘草爲九土之精故能解諸毒也千金方云甘草解百藥毒如湯沃雪有中烏頭巴豆毒甘草入腹卽定驗如反掌方稱大豆解百藥毒予每試之不效加甘草爲甘豆湯其驗甚捷嶺南人解蠱凡飲食時先用炙甘草一寸嚼之其中毒隨卽吐出

黃耆 甘溫無毒入益氣藥炙用入解表及托理藥生用肥潤而軟者良堅細而枯者食之令人胸滿

本經主癰疽久敗排膿止痛大風癩疾五痔鼠瘦補
虛小兒百病

發明 黃耆甘溫氣薄味厚升少降多陰中陽也能
補五藏諸虛入手足太陰手陽明少陽而治脉弦自
汗瀉陰火去肺熱無汗則發有汗則止入肺而固表
虛自汗入脾而托已潰癰瘍本經首言癰疽久敗排
膿止痛次言大風癩疾五痔鼠瘦皆用生者以疏衛
氣之熱性雖溫補而能通調血脈流行經絡可無擬

於壅滯也其治氣虛盜汗自汗及皮膚痛是肌表之藥治咯血柔脾胃是中州之藥治傷寒尺脉不至補腎藏元氣不足及嬰兒易感風邪發熱自汗諸病皆用灸者以實衛氣之虛乃上中下內外三焦藥卽本經補虛之謂如痘疹用保元湯治脾肺虛熱當歸補血湯治血虛發熱皆爲聖藥黃耆同人參則益氣同當歸則補血同白朮防風則運脾溼同防己防風則祛風溼同桂枝附子則治衛虛亡陽汗不止爲腠理

開闔之總司又黃耆性專實衛溫補下元而當歸補
血湯曷不用地黃之屬反用此三倍於歸其義何居
蓋陰血之虛而發熱明係陽從陰亢自必峻用陰中
之陽藥爲君兼當歸引入血分自然陽生陰長陰邪
退去而亢熱除矣若用純陰滋膩徒資膠滯熱無由
而散也是須黃耆固護其營不使重奪其汗而陰自
守熱自除矣昔人言無汗不得用黃耆服之令人胸
滿此指表實形瘦色蒼胸中氣盛者而言若衛氣虛

衰之人感寒雖用表藥多不能作汗須用黃耆建中之屬始得汗解不可拘於俗見而廢聖法也唐許胤宗治柳太后病風不能言脈沉而口噤乃造黃耆防風湯數斛置於牀下氣如烟霧一夕便得語也此義惟玉屏風散得之黃耆性畏防風然得防風其功愈大蓋相畏而相使者也

人參

古作藹

甘苦微溫無毒產高麗者良反藜蘆畏

鹵鹽陰虛火炎欬喘逆者青鹽製之

本經補五藏安精神定魂魄止驚悸除邪氣明目開心益智久服輕身延年

發明 人參甘溫氣薄味厚陽中微陰能補肺中元

氣肺氣旺四藏之氣皆旺精自生而形自盛肺主諸氣故也古人血脫益氣蓋血不自生須得補陽氣之藥乃生陽生則陰長血乃旺耳若單用補血藥血無由而生也素問言無陽則陰無以生無陰則陽無以化故補氣必用人參補血須兼用之仲景言病人汗

後身熱亡血脈沉遲下利身涼脈微血虛並加人參
蓋有形之血未能卽生希微之氣所當急固無形生
有形也丹溪言虛火可補參耆之屬實火可瀉苓連
之屬後世不察槩謂人參補火謬矣夫火與元氣勢
不兩立正氣勝則邪氣退人參旣補元氣又補邪火
是反復之小人矣又何與甘草茯苓白朮爲四君子
耶凡人面白面黃面青黧悴者皆脾肺腎氣不足可
用也面赤面黑者氣壯神強不可用也脈浮而芤濡

虛大遲緩無力沉而遲濇弦細微弱結代或右手關部無力皆可用也若弦強緊實滑數洪盛長大有力或右手獨見脈實皆火鬱內實不可用也潔古謂喘嗽勿用者痰實氣壅之喘也若腎虛氣短喘促者必用也仲景謂肺寒而嗽勿用者寒束熱邪壅滯在肺之嗽也若自汗惡寒而嗽者必用也東垣謂久病鬱熱在肺勿用者乃火鬱於內宜發不宜補也若肺虛火旺氣短自汗者必用也丹溪言諸痛不可驟用者

乃邪氣方銳宜散不宜補也若裡虛吐利及久病胃弱虛痛喜按者必用也節齋謂陰虛火旺吐血勿用者乃血虛火亢能食脈強服人參則陽愈旺陰愈消未有不引血大脫也若自汗氣短肢寒脈虛者必用也古今治勞莫過於葛可久其獨參湯保真湯未嘗廢人參而不用惟痲疹初發身發熱而斑點未形傷寒始作證未定而熱邪方熾不可用耳喻嘉言曰傷寒有宜用人參入藥者發汗時元氣大旺外邪乘勢

而出若元氣素弱之人藥雖外行氣從中餒輕者半
出不出留連致困重者隨元氣縮入發熱無休所以
虛弱之人必用人參入表藥中使藥得力一湧而出
全非補養之意卽和解藥中有人參之大力居間外
邪遇正自不爭而退舍亦非偏補一邊之意而不知
者謂傷寒無補邪得補彌熾斷不敢用而市井愚夫
乃交口勸病人不宜服參醫者又避嫌遠謗一切可
生之機悉置之不理殊失本經除邪氣之旨矣古今

諸方表汗用參蘇飲敗毒散和解用小柴胡解熱用
白虎加人參湯竹葉石膏湯攻下用黃龍湯領人參
深入驅邪卽熱退神清從仲景至今明賢方書無不
用人參何爲今日醫家屏絕不用以阿諛求容全失
一脉相傳宗旨殊不知誤用人參殺人者皆是與黃
耆白朮乾薑當歸肉桂附子同行溫補之誤所致不
與羌獨柴前芎半枳桔等同行汗和之法所致也安
得視人參爲砒鴆刀刃固執不用耶又痘疹不宜輕

用人參者青乾紫黑陷血熱毒盛也若氣虛頂陷色
白皮薄泄瀉漿清必用也故博愛心鑑治痘以保元
湯爲要藥人參得升麻補上焦之氣瀉中州之火得
茯苓補下焦之氣瀉腎中之火東垣交泰丸用人參
皂莢是惡而不惡也治月閉用四物加人參五靈脂
是畏而不畏也痰在胸膈以人參藜蘆同用而取涌
越是激其怒性也惟右手獨見脉實者爲肺經本有
火故不宜用若右手虛大而嗽者雖有火邪此爲虛

火上炎腎水不足乃刑金之火非肺金之火正當以
人參救肺但須多用方始得力若少用必增脹滿本
經言安五藏定魂魄止驚悸明目開心益智者以藏
氣安和心神寔定當無驚悸昏昧之慮矣其除邪氣
者以甘溫之力協諸表藥助胃祛邪譬諸坐有君子
則小人無容身之地矣繆子經疏云人參論其功能
之廣如本經所說信非虛語第其性亦有所不宜世
之錄其長者或遺其短摘其瑕者并棄其瑜是以或

當用而後時或非宜而罔投或蒙其利反見其害二者之誤其失則一使良藥不見信於世粗工互騰其口說豈知人參本補五藏眞陽之氣者也若夫虛羸疴怯勞役饑飽所傷努力失血以致陽氣短乏陷入陰分發熱倦怠四肢無力或中暑傷氣氣無以動或嘔吐泄瀉霍亂轉筋胃弱不食脾虛不磨或眞陽衰少腎氣乏絕陽道不舉或中風失音產後氣喘小兒慢驚痘後氣虛潰瘍長肉等證投之靡不立効惟不

利於肺家有熱欬嗽吐血衄血骨蒸勞瘵陰虛
火動之候蓋肺者清肅之藏真氣無虧則宜謐清淨
以受生氣之熏蒸而朝百脉苟縱恣情欲虧損真陰
火空則發熱起於下火爍乎上則肺先受之火乃肺
之賊邪邪氣勝則實實則肺熱鬱結爲痰嗽癢而血
熱妄行溢出上竅王好古所謂肺熱還傷肺是也若
誤投之鮮克免者此皆實實之誤於人參何咎哉○
產山西太行山者名上黨人參雖無甘溫峻補之功

却有甘平清肺之力亦不似沙參之性寒專泄肺氣也○參蘆能氣專入吐劑涌虛人膈上清飲宜之鹽哮用參蘆涌吐最妙參蘆涌吐參鬚下泄與當歸紫苑之頭止血身和血尾破血之意不殊參鬚價廉貧乏之人往往用之其治胃虛嘔逆欬嗽失血等證亦能獲效以其性專下行也若治久痢滑精崩中下血之證每致增劇以其味苦降泄也其蘆世罕知用惟江右人稱爲竹節參近日吾吳亦有用之者其治

本經通原卷一
刻醫學初階
瀉利膿血崩帶精滑等證俱無妨礙如氣虛火炎喘
嘔嗽血誤用轉劇昔人用以涌吐者取其性升而於
補中寓瀉也此義前人未發因屢驗而筆之

沙參 甘淡微寒無毒有南北二種北者質堅性寒
南者體虛力微反藜蘆

本經主血結驚氣除寒熱補中益肺氣

發明 沙參專泄肺氣之熱故喘嗽氣壅小便赤澀
不利金受火尅陰虛失血或喘欬寒熱及肺痿等疾

宜之本經主血結驚氣者因驚氣入心心包熱鬱而
血結也除寒熱者鬱熱解而寒熱除也補中益肺氣
者用以清理脾胃之虛熱則津液復而正氣受益矣
潔古言肺寒用人參肺熱用沙參好古言沙參性寒
補五藏之陰總未達輕虛泄熱之義也衛生方治肺
熱欬嗽沙參一味水煎服之肘後方治卒然疝痛自
汗欲死沙參爲末酒服立瘥證治要訣治婦人白帶
沙參爲末米飲服之蓋沙參專開肺氣肺氣清則木

邪散而疝自除帶自愈矣時珍云人參甘苦而温其
 體重實專補脾胃元氣因而益肺與腎故內傷元氣
 者宜之沙參甘淡而寒其體輕虛專清肺氣因而益
 脾與腎故金受火尅者宜之此即本經補中益肺氣
 之謂一補陽而生陰一補陰而制陽不可不辨

桔梗

本經名
薺芩

辛甘苦微温無毒甘者為薺芩苦者

為苦梗咬之腥濇者為木梗不堪入藥

本經主胸脇痛如刀刺腹滿腸鳴幽幽驚恐悸氣

發明 桔梗上升清肺氣利咽喉爲肺部引經又能
開發皮腠故與羌獨柴胡藟蘇輩同爲解表藥與甘
草同爲舟楫之劑諸藥有此一味不能下沉也傷寒
邪結胸脇則痛如刀刺邪在中焦則腹滿腸鳴幽幽
辛甘升發苦淡降泄則邪解而氣和矣其主驚恐悸
氣者心脾氣鬱不舒用以升散之也朱肱用桔梗治
胸中痞滿總不出本經主治仲景治寒實結胸同貝
母巴豆取其溫中消穀破積也治肺癰唾膿血用桔

梗甘草取排膿而清濁氣也治少陰證二三日咽痛
用甘桔湯取其調寒熱通陰氣也千金方治喉痹毒
氣桔梗二兩水煎頓服加甘草連翹荆防名如聖湯
通治咽喉諸病桔梗有甘苦二種甘者曰薺芫千金
治強中爲病莖長與發不交精出取其能升解熱邪
於上也又乾欬嗽乃痰火之邪鬱在肺中亦宜甘以
潤之痢疾腹痛乃肺金之氣鬱在大腸則宜苦以開
之甘升而苦降也此藥升降諸氣能入肺使諸氣下

降俗泥爲上升而不能下行失其用矣痘疹下部不能起發爲之切忌以其性升能阻藥力於上不得下達也惟陰虛久嗽不宜用以其通陽泄氣也其蘆吐膈上風熱實痰生研末白湯調服二三錢探吐之

黃精 甘平無毒勿誤用鈎吻鈎吻卽野葛葉頭尖有毛鈎子又名斷腸草誤服殺人黃精則莖紫花黃葉似竹葉也

發明 黃精爲補中宮之勝品寬中益氣使五藏調

和肌肉充盛骨髓堅強皆是補陰之功但陽衰陰盛人服之每致泄瀉痞滿不可不知

萎蕤

本經名女萎又名玉竹

甘平無毒肥白者良入發散風

熱藥生用入補藥蜜水拌飯上蒸熟用

本經主中風暴熱不能動搖跌筋結肉諸不足久服去面黑黧好顏色潤澤輕身不老

發明 萎蕤甘潤性平滋肺益腎補而不壅善調厥

陰久襲之風故本經治中風暴熱等病皆取其養正

祛邪之力也別錄主心腹結氣虛熱腰痛莖中寒目
痛皆爛淚出甄權主內補不足去虛勞客熱頭痛不
安千金治風温自汗身重語言難出萎蕤湯以之爲
君其源本諸麻黃升麻湯深得仲景之奧時珍用治
虛勞寒熱疔瘡不足之證用代參耆不寒不燥大有
殊功不止於去風熱温毒而已又主小便卒淋發熱
口乾眼黑頭眩目赤澀痛其性雖潤而無傷犯脾胃
奪食泄瀉之虞但其性之緩耳

知母 苦平寒無毒肥白者良鹽酒炒用

本經主消渴熱中除邪氣肢體浮腫下水補不足益氣

發明 知母沉降入足少陰氣分及足陽明手足太陰能瀉有餘相火理消渴煩蒸仲景白虎湯酸棗湯皆用之下則潤腎燥而滋陰上則清肺熱而除煩但外感表證未除瀉痢燥渴忌之脾胃虛熱人誤服令人作瀉減食故虛損大忌近世誤爲滋陰上劑勞瘵

神丹因而夭枉者多矣本經言除邪氣肢體浮腫是指溼熱水氣而言故下文云下水補不足益氣乃溼熱相火有餘燥灼精氣之候故用此清熱養陰邪熱去則正氣復矣

肉蓯蓉 甘鹹微溫無毒酒洗去甲及腐切片焙用

本經主五勞七傷補中除莖中寒熱痛養五藏強陰益精氣多子婦人癥瘕

發明 肉蓯蓉與瑣陽總是一類味厚性降命門相

火不足者宜之峻補精血驟用反動大便滑泄本經
主勞傷補中者是火衰不能生土非中氣之本虛也
治婦人癥瘕者鹹能稟堅而走血分也又菝蓉止洩
精遺瀝除莖中寒熱痛以其能下導虛火也鎖陽治
腰膝軟弱以其能溫補精血也總皆滋益相火之驗
老人燥結宜煮粥食之但胃氣虛者服之令人嘔吐
泄瀉強陽易興而精不固者忌之

天麻

本經名離母一名
定風草莖名赤箭

辛平微溫無毒溼紙裏煨

熟切片用

本經主殺鬼精物蠱毒惡氣久服益氣力長陰肥健
發明 天麻味辛濃厚性升屬陽爲肝家氣分藥故
肝虛不足風從內生者天麻芎藭以補之諸風掉眩
眼黑頭旋風虛內作非天麻不治小兒驚痰風熱服
天麻卽消天麻乃定風草久服則遍身發出紅斑是
驅風之驗也按天麻性雖不燥畢竟風劑若血虛無
風火炎頭痛口乾便閉者不可妄投本經言殺鬼精

物蠱毒惡氣者以其能定風鎮八方之邪氣也久服益氣力長陰肥健者其性屬陽陽生則陰長也

白朮一名山薑

甘温無毒○雲朮肥大氣壅台朮條細

力薄宜國狗頭朮皮赤稍大然皆栽灌而成故其氣濁不若於潛野生者氣清無壅滯之患○入諸補氣藥飯上蒸數次用入肺胃久嗽藥密水拌蒸入脾胃痰溼藥薑汁拌晒入健脾藥土炒入瀉痢虛脫藥炒存性用入風痺痰溼利水破血藥俱生用然非於潛產

者不可生用也

本經主風寒溼痺死肌痙疸止汗除熱消食作煎餌
久服輕身延年不饑

發明 白朮甘温味厚陽中之陰可升可降入脾胃
二經生用則有除溼益燥消痰利水治風寒溼痺死
肌痙疸散腰臍間血及衝脉爲病逆氣裡急之功製
熟則有和中補氣止渴生津止汗除熱進飲食安胎
之効本經主風寒溼痺死肌痙疸者正以風寒溼三

者合而成癘癘者拘攣而痛是也經曰地之溼氣感則害人皮肉筋骨死肌者溼毒侵肌肉也瘞者風寒乘虛客於肝肺腎經所致也疽者脾胃虛而溼熱瘀滯也如上諸證莫不由風寒溼而成尤有除此三者之功故能祛其所致之疾也止汗除溼進食者溼熱盛則自汗溼邪客則發熱溼去則脾胃燥燥則食自消汗自止熱自除矣又主大風在身而風眩頭痛目淚出消痰水逐皮膚間風水結腫除心下急滿及霍

亂吐下不止利腰臍間血益津煖胃消穀嗜食得參
苓大補中氣得枳橘健運飲食本經言消食作煎餌
留其滓以健運脾氣食自化矣仲景五苓散祖素問
澤朮麋銜湯並用生者但彼兼麋銜以統血則汗自
止此兼桂枝以通津則渴自除潔古枳朮丸祖金匱
枳實湯彼用生者以健脾則逆滿自愈此用熟者以
助脾則飲食自強且以荷葉裹飯爲丸取清震之氣
以鼓剋運之力也蓋白朮得中宮沖和之氣補脾胃

藥以之爲君脾土旺則清氣升而精微上濁氣降而糟粕輸伸淳有云白朮稟純陽之土氣除邪之功勝而益陰之效虧故病屬陰虛血少精不足內熱骨蒸口乾唇燥欬嗽吐痰吐血鼻衄齒衄便閉滯下者法咸忌之朮燥腎而閉氣肝腎有動氣者勿服劉涓子云癰疽忌白朮以其燥腎而閉氣故反生膿作痛也凡藏皆屬陰世人但知白朮能健脾竝知脾虛而無溼邪者用之反燥脾家津液是損脾陰也何補之有

此最易誤故特表而出之

蒼朮

本經名山薊

苦辛溫無毒產茅山者味甘形瘦多

毛最良吳郡諸山者次之楚中大塊辛烈氣燥者爲
下製用糯米泔浸刮去皮切片同芝麻炒或麻油炒
通黃去焦末或去皮切片密水拌飯上蒸用又白露
後以泔水淨置屋上晒露一月謂之神朮

本經主風寒溼痹死肌癰疽

發明 蒼朮辛烈性溫而燥可升可降能徑入諸經

疎泄陽明之溼而安太陰辟時行惡氣因經泔浸炒
故能除上溼發汗與白朮止汗則異腹中窄狹者須
之本經治風寒溼痺死肌痙疽等證總取性專開腠
故能發汗而去風寒溼氣祛溼而去死肌痙疽下氣
而消痰合飲癖又能總解諸鬱佐以香附快氣之藥下氣最速一
升一降則鬱散而氣平也遺精不禁淋濁不止腰背痠痛用以斂
脾津津生於穀氣也同黃蘗爲二妙治下部溼熱痛腫又蒼朮一
味麻油制過爲末煮大棗肉爲丸治脇下飲癖許叔微患飲癖三

十年始因少年夜坐寫文左向伏几是以飲食多墜
左邊飲酒止從左下有聲脇痛食減嘈雜飲酒半杯
卽止不數日必嘔酸水暑月左半身絕無汗服雄附
礬石牽牛遂戟等皆無效自揣必有癖囊如水之有
窠曰不盈科不行乃悉屏諸藥以前丸服三月而疾
除暑月汗亦周身燈下能書細字皆蒼朮之力也然
惟素稟肥盛多溼者爲宜若形瘦多火者禁用○其
神朮已經露製轉燥爲清用以發散上部頭風痰溼

諸證故治時行頭痛有神朮湯此得制度之妙也

狗脊

本經名百枝

苦平微温無毒酒浸炒去毛用

本經主腰背强關機緩急周痺寒溼膝痛頗利老人發明 狗脊爲强筋骨要藥故本經主腰背强周痺寒溼等疾頗利老人者補益腎氣而堅强筋骨也其性味形類與萆薢相似而功用亦不甚相遠四寶丹用金毛狗脊去毛鹽泥固濟煨紅蘇木萆薢川烏頭生用等分爲末醋和丸温酒鹽湯下二十九治男婦

毒風脚軟腎氣虛弱又病後足腫煎湯洗効

貫眾

別錄名
草鴟頭

苦微寒有毒

本經主腹中邪熱氣諸毒殺三蟲

發明 貫眾苦寒而降辟時行疫癘不正之氣疫發

之時以此藥置水食之則不傳染且能解毒更堅治

婦人血氣本經治腹中邪熱氣諸毒以其性專散結

積諸毒而蟲積皆由溼熱所生苦寒能除溼熱故亦

主之王海藏治夏月痘出不快快斑散用之云貫眾

有毒而能解腹中邪熱殺三蟲病從內發者多効王
 璆百一選方言食鯉魚羹爲肋骨所鯁百藥不効或
 令以貫眾煎濃汁連進一咯而出可見軟堅之功不
 但治瘡治血而已病人虛寒無實熱者勿服

巴戟天 辛甘微温無毒酒浸去心焙用川產者良
 本經主大風邪氣陰痿不起強筋骨安五藏補中增
 志益氣

發明 巴戟天嚴冬不凋腎經血分及衝脈藥也故

守真地黄飲子用之卽本經治大風邪氣之謂以其
性補元陽而兼散邪真元得補邪安所留是以可愈
大風邪氣也主陰痿不起強筋骨安五藏補中增志
益氣者脾胃二經得所養而諸虛自瘥矣又治脚氣
補血海病人虛寒加用之有人嗜酒患脚氣甚危或
教以巴戟半兩糯米同炒去米大黃一兩炒爲末熟
蜜丸溫水下七十九仍禁酒遂愈惟陰虛相火熾盛
者禁用

遠志

苗名
小草

辛苦温無毒甘草湯泡去骨製過不可

陳久久則油氣戟入喉

本經主欬逆傷中補不足除邪氣利九竅益智慧耳目聰明不忘強志倍力久服輕身不老

發明 遠志入足少陰腎經氣分非心經藥也專於

強志益精主夢泄蓋精與志皆腎所藏腎氣充九竅利智慧生耳目聰明邪氣不能為害腎氣不足則志氣衰不能上通於心故迷惑善忘不能閉蟄封藏故

精氣不固也小便赤濁用遠志甘草茯神益智爲丸
棗湯服効取其爲陰火之嚮導也昔人治喉痹失音
作痛遠志末吹之涎出爲度取其通腎氣而開竅也
又治婦人血噤失音及一切癰疽搐鼻治腦風殺烏
附毒惟水虧相火旺者禁服以其善鼓龍雷之性也
本經言治欬逆傷中詳遠志性溫助火非欬逆所宜
當是嘔逆之誤以其性稟純陽善通諸竅竅利則耳
目聰明強志不忘皆益腎氣之驗別錄云去心下膈

氣非嘔逆之類乎一切陰虛火旺便濁遺精喉痹腫痛慎用苗名小草亦能利竅兼散少陰風氣之結也

淫羊霍 一名仙靈脾

辛溫無毒羊脂或酒炒用

本經主陰痿絕傷莖中痛利小便益氣力强志

發明 淫羊霍手足陽明三焦命門藥也辛以潤腎

溫以助陽故本經治陰痿絕傷等證真陽不足者宜

之堅筋骨消瘰癧一切冷風勞氣筋骨攣急四肢不

仁補腰膝强氣力一味仙靈脾酒為偏風不遂之要

藥惟陰虛走精強陽不痿禁服

仙茅

辛溫有毒忌犯鐵器酒浸焙乾用

發明

仙茅性熱補三焦命門之藥惟陽衰精冷下

元痿弱老人失溺無子男子稟賦素虛者宜之若體壯相火熾盛者服之反能動火爲害叵測按醫說云一人中仙茅毒舌脹出口漸大與肩齊以小刀斨之隨破隨合斨至百數始有血一點出口可救矣煮大黃芒硝與服以藥摻之應手消縮此皆火盛性淫之

人過服之害也然川產者少偽充者多不可不辯

玄參

一名黑參

苦微寒無毒反藜蘆

本經主腹中寒熱積聚女子產乳餘疾補腎氣令人

明目

發明 黑參入足少陰腎經主腎水受傷真陰失守

孤陽無根亢而僭逆咽喉腫痛之專藥又治傷寒陽

毒汗下不解發斑咽痛心下懊懺煩不得眠心神顛

倒欲絕者俱用玄參專清上焦氤氳之氣無根之火

本經治腹中寒熱積聚女子產乳餘疾并可清有形
熱滯故消癭癥結核治目赤腫痛本經又云補腎氣
令人明目不特治暴赤腫痛總皆散結清火之驗也
但其性寒滑脾虛泄瀉者禁用

地榆 苦澁微寒無毒去梢酒拌炒黑用

本經主婦人乳產痙痛七傷帶下五漏止痛止汗除
惡肉療金瘡

發明 地榆入足厥陰兼行手足陽明體沉而降善

入下焦理血本經主乳產痙痛七傷帶下五漏者是
指去血過多肝風內生之象又云止汗止痛除惡肉
療金瘡者以其能和血也若氣虛下陷而崩帶及久
痢膿血瘀晦不鮮者又爲切禁性能傷胃誤服多致
口噤不食又諸瘡痛者加地榆癢者加黃芩以其能
散血熱也燒灰香油調敷火燙乃借火氣引散血中
之火毒耳梢專行血不可混用

丹參 苦平微溫無毒酒炒用反藜蘆

本經主心腹邪氣腸鳴幽幽如走水寒熱積聚破癥
除瘕止煩滿益氣

發明 丹參氣平而降心與包絡血分藥也本經治
心腹邪氣腸鳴幽幽如走水等疾皆瘀血內滯而化
爲水之候止煩滿益氣者瘀積去而煩滿愈正氣復
也按四物湯治婦人病不問胎前產後經水多少皆
可通用惟一味丹參散主治與之相同蓋丹參能破
宿血生新血安生胎落死胎止崩中帶下調經脈之

神品然其性長於行血妊娠無故勿服大便不實者

忌之

紫參

即牡蒙又名童腸。三四月間遍地茸生高三五寸逐層起臺開紫花者是也。

苦辛

寒無毒反藜蘆

本經主心腹積聚寒熱邪氣通九竅利大小便

發明 紫參入足厥陰兼入足太陽陽明血分故治

諸血病及寒熱血痢癰腫積塊即本經治心腹積聚

寒熱邪氣之謂瘀血去則九竅利而二便通矣古方

治婦人腸覃鳥喙丸中用牡蒙卽紫參也仲景治下痢肺痛用紫參湯取其散積血也但市人罕識其真詳痢下肺痛皆胸中氣結之故每以紫菀代之雖氣味之寒溫不同疎利之性則一

紫草 甘鹹寒無毒色深紫而脆者良淡紫質堅者曰紫梗不入藥

本經主心腹邪氣五疳補中益氣利九竅

發明 紫草入心胞絡及肝經血分其功專於涼血

活血利大小腸故痘疹欲出未出血熱毒盛大便閉
澀色乾枯而毒不得越者宜之已出而紫黑便閉者
亦可用蓋紫草涼血血涼則毒出世俗誤以爲宣發
之藥非也若已出而色紅活者不宜或白陷及大小
便利者忌之本經言治心腹邪氣五痺者乃活血利
竅之義發痘卽活血利竅之大端也言補中益氣者
營血和則中氣受益矣

白頭翁

一名野丈人

苦微寒無毒產齊魯苗長葉白者

力優生柴胡中短小者力薄得酒良

本經主溫瘧狂猖寒熱癥瘕積聚癭氣逐血止腹痛
療金瘡

發明 白頭翁味苦微寒入手足陽明血分本經言
苦溫者傳寫之誤也其治溫瘧狂猖寒熱等症皆少
陽陽明熱邪固結之病結散則積血去而腹痛止矣
別錄止鼻衄弘景止毒痢亦是熱毒入傷血分之候
仲景治熱痢下重有白頭翁湯蓋腎欲堅急食苦以

堅之痢則下焦虛故以純苦之劑堅之男子陰疝偏墜小兒頭禿鼻衄及熱毒下痢紫血鮮血用此並効但胃虛大便完穀不化痢久下稀淡血水者勿服以其苦寒降泄也

白及 苦辛平微寒無毒反烏附

本經主癰腫惡瘡敗疽傷陰死肌胃中邪氣賊風鬼擊痲緩不收

發明 白及性濇而收得秋金之氣故能入肺止血

生肌治瘡本經主敗疽傷陰死肌皆熱壅血傷胃中
邪氣亦邪熱也賊風痲緩皆血分有熱溼熱傷陰所
致也其治吐血咯血爲其性斂也用此爲末米飲服
之卽止試血法吐水盆內浮者肺血沉者肝血半浮
半沉者心血各隨所見以羊肺肝心煮熟蘸白及末
每日食之其治金瘡及癰疽方多用之

三七 綱目名山漆
一名金不換

甘微苦溫無毒 廣產形如人參
者是有節者非

發明 時珍云此藥近時始出南人軍中用爲金刃

本經通原卷一
刻醫學初階
箭瘡要藥止血散血定痛爲末摻之吐血衄血崩中
下血血痢產後惡血不下並宜服之凡杖撲傷損瘀
血淋漓者隨卽嚼爛罨之青腫者卽消若受杖時先
服一二錢則血不衝心杖後尤宜服之此陽明厥陰
血分之藥故能治一切血病獨用研服尤良取其專
力也一種庭砌栽植者以苗擣敷腫毒卽消亦取散
血之意

黃連 苦寒無毒產川中者中空色正黃截開分瓣

者爲上雲南水連次之日本吳楚爲下治心藏火生
用治肝膽實火猪膽汁炒治肝膽虛火醋炒褐色治
上焦火酒炒中焦火薑汁炒下焦火鹽水炒氣分鬱
結肝火煎吳茱萸湯炒血分塊中伏火同乾漆末炒
食積火黃土拌炒○解附子巴豆輕粉毒忌豬肉
本經主熱氣目痛背傷淚出明目腸澀腹痛下痢婦
人陰中腫痛

發明 黃連性寒味苦氣薄味厚降多升少入手少

陰厥陰苦入心寒勝熱黃連大黃之苦寒以導心下之實熱去心竅惡血仲景九種心下痞五等瀉心湯皆用之瀉心者其實瀉脾實則瀉其子也下痢胃口虛熱口噤者黃連人參煎湯時時呷之如吐再飲但得一呷下咽便好諸苦寒藥多瀉惟黃連芩蘘性寒而燥能降火去溼止瀉痢故血痢以之爲君今人但見腸虛滲泄微似有血不顧寒熱多少便用黃連由是多致危殆至於虛冷白痢及先瀉後痢之虛寒證

誤用致死者多矣諸痛瘍瘡皆屬心火眼暴赤腫痛不可忍亦屬心火兼挾肝邪俱宜黃連當歸治痢及目爲要藥故本經首言治熱氣目痛及腸澼腹痛之患取苦燥之性以清頭目堅腸胃祛溼熱也婦人陰中腫痛亦是溼熱爲患尤宜以苦燥之古方治痢香連丸用黃連木香薑連散用乾薑黃連佐金丸用黃連吳茱萸治消渴用酒蒸黃連治口瘡用細辛黃連治下血用黃連葫蒜皆是寒因熱用熱因寒用而無

偏勝之害然苦寒之劑中病卽止豈可使肅殺之令
常行而伐生發沖和之氣乎醫經有久服黃連苦參
反熱之說此性雖寒其味至苦入胃則先歸於心久
而不已心火偏勝則熱乃其理也近代庸流喜用黃
連爲清劑殊不知黃連瀉實火若虛火而妄投反傷
中氣陰火愈逆上無制矣故陰虛煩熱脾虛泄瀉五
更腎泄婦人產後血虛煩熱小兒痘疹氣虛作瀉及
行漿後泄瀉並皆禁用

胡黃連 苦大寒無毒忌豬肉犯之令人漏精

發明 胡黃連苦寒而降大伐藏府骨髓邪熱除婦

人胎蒸小兒疳熱積氣之峻藥同烏梅止小兒血痢

同雞肝治小兒疳眼同豬胰療楊梅瘡毒同乾薑治

菓子積皆取伐肝腎熱邪也小兒腎氣本實故可當

此若脾胃腎藏不足者服之奪人天元爲害不淺惟

徽瘡用胡黃連當歸甘草猪脰水酒煎服二劑輒効

以其直達下焦善搜淫火之毒也

黃芩 苦寒無毒中空者爲枯芩入肺細實者爲子芩入大腸並煮熟酒炒用

本經主諸熱黃痺腸澼泄利逐水下血閉治惡瘡疽蝕火瘍

發明 黃芩苦燥而堅腸胃故溼熱黃痺腸澼瀉痢爲必用之藥其枯芩性升入手太陰經清肌表之熱條芩性降瀉肝膽大腸之火除胃中熱得酒炒上行主膈上諸熱得芍藥甘草治下痢膿血腹痛後重身

熱佐黃連治諸瘡痛不可忍同黑參治喉間腥臭助
白朮安胎蓋黃芩能清熱涼血白朮能補脾統血也
此惟胎熱升動不寧者宜之胎寒下墜及食少便澹
者慎毋混用丹溪言黃芩治三焦火仲景治傷寒少
陽證用小柴胡湯汗下不解胸滿心煩用柴胡桂薑
湯溫病用黃芩湯太陽少陽合病用葛根黃芩黃連
湯心下痞滿用瀉心湯寒格吐逆用乾薑黃芩黃連
人參湯等方皆用黃芩以治表裏諸熱使邪從小腸

而泄皆本經主諸熱之綱旨其黃痺腸澼瀉痢之治取苦寒以去溼熱也逐水下血閉者火鬱血熱之所致火降則邪行水下而閉自通矣昔人以柴胡去熱不及黃芩蓋柴胡專主少陽往來寒熱少陽爲樞非柴胡不能宣通中外黃芩專主陽明蒸熱陽明居中非黃芩不能開泄蘊隆一主風木客邪一主溼土蘊蓄詎可混論芩雖苦寒畢竟治標之藥惟軀殼熱者宜之若陰虛伏熱虛陽發露可輕試乎其條實者兼

行衝脈治血熱妄行古方有一味子芩丸治婦人血
熱經水暴下不止者最効若血虛發熱腎虛挾寒及
妊娠胎寒下墜脈遲小弱皆不可用以其苦寒而伐
生發之氣也

秦艽 苦平微溫無毒雷公云左文列爲秦治溼病
右文列爲芩治脚氣今藥肆多右文者慎勿混用
本經主寒熱邪氣寒溼風痺肢節痛下水利小便
發明 秦艽陰中微陽可升可降入手足陽明以其

去溼也兼入肝膽以其治風也故手足不遂黃痺酒
毒及婦人帶疾須之陽明有溼則身體痠痛肢節煩
疼及攣急不遂有熱則日晡潮熱用以祛風勝溼則
愈凡痛有寒熱或浮腫者多挾客邪用此以祛風利
溼方爲合劑故本經治寒熱邪氣寒溼風痺肢節痛
等證若久痛虛羸血氣不能營養肢體而痛及下體虛
寒痛痠枯瘦等病而小便清利者咸非秦艸所宜今
庸師喜用秦艸且不辨左文右文凡遇痛證動輒用

之失其旨矣

柴胡

卽茈胡

苦平無毒入解表藥生用清肝炒熟用

本經主心腹腸胃中結氣飲食積聚寒熱邪氣推陳
致新明目益精

發明 柴胡能引清陽之氣從左上升足少陽膽經

之藥膽爲清淨之府無出無入禁汗吐下惟宜和解
以其經居半表半裏本經治心腹腸胃結氣飲食積
聚寒熱邪氣使清陽之氣上升而胃中留結宿滯亦

得解散矣仲景治傷寒寒熱往來脇痛耳聾婦人熱入血室皆爲必用小兒五疳羸熱諸瘧寒熱咸宜用之痘疹見點後有寒熱或脇下疼熱於透表藥內用之不使熱留少陽經中則將來無咬牙之患虛勞寒熱多有可用者勞有五勞病在五藏若勞在肝膽心包絡有熱或少陽經寒熱則柴胡爲必用藥勞在脾胃有熱或陽氣下陷則柴胡乃引清氣退熱之藥惟勞在肺腎者不可用東垣補中益氣用之者乃引肝

膽清陽之氣上行兼升達參耆之力耳瘡疽用之者
散諸經血結氣聚也今人以細者名小柴胡不知小
柴胡乃湯名也若大柴胡湯而用銀州者可乎按柴
胡爲少陽經藥病在太陽服之太早則引寇入門病
在陰經用之則重傷其表誤人不可勝數其性升發
病人虛而氣升者忌之嘔吐及陰火炎上者勿服若
陰虛骨蒸服之助其虛陽上逆勢必耗盡真陰而後
已奈何操司命之權者多所未悟也

銀柴胡 甘微寒無毒銀州者良今延安府五原城
所產者長尺餘肥白而軟北地產者如前胡而軟今
人謂之北柴胡勿令犯火犯火則不效

發明 銀柴胡行足陽明少陰其性味與石斛不甚
相遠不獨清熱兼能涼血和劑局方治上下諸血龍
腦雞蘇丸中用之凡入虛勞方中惟銀州者爲宜若
用北柴胡升動虛陽發熱喘嗽愈無寧宇可不辯而
混用乎按柴胡條下本經推陳致新明目益精皆指

銀夏者而言非北柴胡所能也

前胡 苦微寒無毒甄權曰甘辛平無毒白色者良去尾用

發明 前胡入手足太陰陽明少陽其功長於下氣故能治痰熱喘嗽痞膈諸疾氣下則火降痰亦降矣爲痰氣之要味治傷寒寒熱及時氣內外俱熱按二胡通爲風藥但柴胡主升前胡主降有不同耳又按前胡治氣實風痰凡陰虛火動之痰及不因外感而

有痰者禁用

防風 甘辛溫無毒又頭者令人煩喘又尾者發人痼疾

本經主大風頭眩痛惡風風邪目盲無所見風行周身骨節疼痛

發明 防風浮而升陽也入手太陽陽明少陽厥陰兼通足太陽治風去溼之仙藥以風能勝溼也其治大風頭眩痛惡風風邪等病其性上行故治上盛風

邪瀉肺實喘滿及周身痺痛四肢攣急目盲無所見
風眼冷淚總不出本經主治也防風治一身盡痛乃
卒伍卑賤之職隨所引而至風藥中潤劑也若補脾
胃非此引用不能行蓋於土中瀉水也凡脊痛項強
不可回顧腰似折項似拔者乃手足太陽證正當用
之凡瘡在胸膈已上者雖無手足太陽證亦當用防
風爲能散結去上部風熱也經驗方治婦人風入胞
門崩中不止獨聖散用一味防風麩糊酒調丸服然

惟血色清稀而脈浮弦者爲宜如血色濃赤脈來數者又屬一味子芩丸證不可混也惟肺虛有汗喘乏及氣升作嘔火升發嗽陰虛盜汗陽虛自汗者勿服婦人產後血虛發癩嬰兒瀉後脾虛發搐咸爲切禁獨活 辛苦微溫無毒香而紫黑者真

本經主風寒所擊金瘡止痛奔豚癩癩女子疝瘕發明 獨活不搖風而治風浮萍不沉水而治水因其所勝而爲製也本經治金瘡爲風寒所擊而痛及

賁豚癩瘰女子疝瘕皆邪風內賊之候獨活生益州
較羌活其氣稍細升中有降能通達周身而散風勝
溼與細辛同用治厥陰頭痛目眩又足少陰經伏風
頭痛兩足溼痹不能動止者非此不治甄權以獨活
治諸風溼冷奔喘逆氣皮膚苦癢手足攣痛勞損風
毒齒痛皆風溼相搏之病也但氣血虛而遍身痛及陰
虛下體痿弱者禁用南方無剛猛之風一切虛風類
中咸非獨活所宜

羌活 苦辛溫無毒香而色紫者良

發明 羌活生於羌胡雍州隴西西川皆有之治足
太陽風溼相搏一身盡痛頭痛肢節痛目赤膚癢乃
撥亂反正之主帥督脈爲病脊強而厥者非此不能
除甄權以羌活治賊風失音不語多癢手足不遂口
面喎斜癩癧血癩皆風中血脈之病也蘇恭曰療風
宜用獨活兼水宜用羌活風能勝溼故羌活能治水
溼與芎藭同用治太陽厥陰頭痛發汗散表透關利

節非時感冒之仙藥也但內傷元氣血虛頭痛及遍身肢節痛皆非所宜昔人治勞力感寒於補中益氣湯中用之深得補中寓瀉之意

升麻 甘苦平無毒忌見火解葶藶毒

本經辟瘟疫瘴氣邪氣蠱毒入口皆吐出中惡腹痛時氣毒癘頭痛寒熱風腫諸毒喉痛口瘡

發明 升麻能引清氣右升足陽明本藥也本經治

疫瘴蠱毒取性升上行也治中惡腹痛取開發胃氣

也治喉痛口瘡者取升散少陽陽明火熱也同葛根則發散陽明風邪同柴胡則升提胃中清氣引甘溫之藥上升故元氣下陷者用此於陰中升陽以緩帶脈之縮急凡胃虛傷冷鬱遏陽氣於脾土宜升麻葛根以升散其火鬱故補脾胃藥非此引用不効脾痹非此不除升麻葛根湯乃陽明發散藥若初病太陽便服之發動其邪必傳陽明反成其害也又升麻葛根能發痘惟初發熱時可用見點後忌服爲其氣升

發動熱毒於上爲害莫測而痲疹尤爲切禁誤投喘滿
立至按升麻屬陽性升力能扶助陽氣捍禦陰邪故
於淋帶瀉痢脫肛方用之取其升舉清陽於上也古
方治噤口痢用醋炒升麻引人參蓮肉扶胃進食大
有神効凡上盛下虛吐血衄血欬嗽多痰陰虛火動
氣逆嘔吐怔忡癩狂諸證皆在所禁

苦參 苦寒無毒反藜蘆

本經主心腹結氣癥瘕積聚黃痺溺有餘瀝逐水除

癰腫補中明目止淚

發明 苦參黃蘗之苦寒下降皆能益腎蓋取其苦燥溼寒除熱也熱生風溼生蟲故又能治風殺蟲惟腎水爍而相火勝者宜之若脾胃虛而飲食減少肝腎虛而火衰精冷及年高之人不可用也久服苦參多致腰重因其性降而不升也觀本經主治皆溼熱爲患之病詳補中當是補陰之誤以其能除溼熱溼熱去而陰自復目自明矣然惟溼熱者宜之沈存中

苦腰重久坐不能行此因病齒痛數年用苦參揩齒其氣味入齒傷腎所致也後施昭先亦用苦參揩齒歲久亦病腰重自後悉不用之腰疾皆愈或云苦參既能補陰明目何久服反病腰重乎殊不知苦寒之性直入心腎內有溼熱者足以當之始得之則有輔陰祛邪之力清熱明目之功溼熱既去而又服之必致苦寒傷腎腰重腳弱在所不免理固然也何疑之有

白蘚皮

一名白羊鮮

苦鹹寒無毒

本經主頭風黃痺欬逆淋瀝女子陰中腫痛溼痺死

肌不可屈伸起止行步

發明 白鮮皮氣寒善行味苦性燥足太陰陽明經
去風溼熱藥也兼入手太陰陽明爲諸黃風痺要藥
本經所主皆風溼熱邪蘊釀經中之病千金治嬰兒
風癩熱則生風胸中有痰白羊鮮湯取其善祛風熱
也世醫祇施之於瘡科淺矣下部虛寒之人雖有溼
證勿用

延胡索

卽玄胡索

苦辛溫無毒上部酒炒中部醋炒下

部鹽水炒

發明 延胡索色黃入脾胃能活血止痛治小便溺
血得五靈脂同入肝經散血破滯炮炙論曰心痛欲
死急覓延胡以其能散胃脘氣血滯痛也蓋當歸芍
藥調腹中血虛痛延胡五靈治胸腹血滯痛又延胡
善行血中氣滯氣中血滯與當歸桂心治一身上下
諸痛及經癸不調產後血病往往獨行多功雜他藥
中便緩按延胡走而不守惟有瘀滯者宜之若經事

先期虛而崩漏產後血虛而暈咸非所宜

貝母 甘苦平微寒無毒反烏頭川者味甘最佳西
者味薄次之象山者微苦又次之一種大而苦者僅
能解毒並去心用凡肺經藥皆當去心不獨貝母也
其獨顆無瓣者名丹龍睛誤服令人筋不收持

本經主傷寒煩熱淋瀝邪風疝瘕喉痺乳難金瘡風
瘰

發明 貝母乃手太陰肺經氣分藥兼入手少陰心

經一名蟲鄘風言采其蟲善解心胸鬱結之氣故詩
人以此寓焉肺受心包火乘因而生痰或爲邪熱所
干喘嗽煩悶非此莫治詳本經主傷寒煩熱者甘寒
能解煩熱也淋瀝者熱結二腸也清心肺鬱熱而淋
瀝通矣疝瘕者足厥陰之邪干手厥陰也經曰診得
心脉搏滑急爲心疝少腹當有形也喉痺者熱鬱結
於上也經云一陰一陽結謂之喉痺心主三焦之脈
皆絡於喉也乳難者鬱熱結於手足厥陰也風痙者

金瘡熱鬱生風而成瘰癧總取解散鬱結之邪也仲景
治傷寒寒實結胸外無熱證者小陷胸湯主之白散
亦可二方一主熱痰內結一主寒實內結雖同一例
治不可混也俗以半夏性燥用貝母代之不知貝母
寒潤治肺家燥痰痰因鬱結者宜之半夏性燥治脾
胃溼痰痰因溼滯者宜之二者天淵何可代用若虛
勞欬嗽吐血咯血肺痿肺癰癰疽及諸鬱火證半夏
乃禁忌皆貝母爲嚮導也至於脾胃溼熱涎化爲痰

久則生火火痰上攻昏憤僵仆蹇瀆諸證生死旦夕
豈貝母可治乎浙產者治疝瘕喉痹乳難金瘡風癩
一切癰瘍又同苦參當歸治妊娠小便難同青黛治
人面惡瘡同連翹治頂上結核皆取其開鬱散結化
痰解毒之功也

山慈姑

金燈花根也九月開花朱色
與葉不相見故又名無義草

甘微辛小毒

發明

山慈姑攻堅解毒治癰腫瘡癩瘰癧結核等

證紫金錠用之亦是解諸毒耳丹方治面上癍痕用

山慈姑末和輕粉礪砂末各少許先用鹼水筆塗患處次摻上藥太乙膏蓋日易一次俟疔瘡消盡後以鷹屎白密陀僧末蜜水調護數日勿見風日效惟眼胞上者不可治以其貶動不輟也

白茅根

一名地筋

甘寒無毒與百脉根相類百脉根出

巴西他處罕得

本經主勞傷虛羸補中益氣除瘀血血閉寒熱利小

便

發明 甘寒能降除伏熱利小便止渴治傷寒呃逆
喘噦主吐衄便溺諸血治黃痺水腫胃反上氣五淋
疼熱及痘瘡乾紫不起但嘔吐衄亦有因於寒者卽
非所宜本經主治勞傷虛羸者以甘寒能滋虛熱而
無傷犯胃氣之虞也言補中益氣胃熱去而中氣復
是指客邪入傷中州漸成虛羸而言非勞傷本病所
宜昔人攷本草功用言白茅根與百脈根相類今肅
州不行歲貢百脈根無從可得而止渴去熱之用白

茅根裕如也其芽花甘溫色白輕虛力能上升入肺
散熱止衄屋上敗茅研傅斑瘡溼爛取其收溼之力
也

草龍膽 苦瀋大寒小毒去蘆或酒炒或甘草湯浸
一宿用凡用勿空腹服令人小便不禁

本經主骨間寒熱驚癇邪氣續絕傷定五藏殺蠱毒
發明 草龍膽苦寒沉降主肝經邪熱下焦溼熱酒
痺黃腫目病赤腫瘀肉小兒肝氣去腸中小蟲蓋肝

膽溼熱取苦寒以瀉之時珍曰相火寄在肝膽有瀉
無補故瀉肝膽之熱正益肝膽之氣但大苦大寒過
傷胃中生發之氣反助火邪亦如久服黃連反從火
化之義本經主骨間寒熱是指熱傷腎水而言熱極
生風則發驚搐重則變爲癇病溼熱邪氣之在中下
二焦者非此不除以其專伐肝膽之邪也肝膽之邪
去而五藏安和經脈之絕傷續矣殺蠱毒者去溼熱
之患也凡胃氣虛人服之必嘔脾虛人服之必瀉雖

有溼熱慎勿輕用

細辛 辛溫無毒產華陰及遼東者良反藜蘆

本經主欬逆頭痛腦痛百節拘攣風溼痹痛死肌明目利九竅

發明 細辛辛溫上升入手足厥陰少陰血分治督脈爲病脊強而厥本經治欬逆頭痛腦痛善搜厥陰伏匿之邪也獨活爲使治少陰頭痛如神亦主諸陽頭痛諸風藥用之治風溼痹痛百節拘攣去死肌明

目者取辛以散結而開經脈竅隧之邪也味辛而熱
溫少陰之經故仲景少陰證用麻黃附子細辛湯辛
溫能散故凡風寒風溼頭痛口瘡喉痺齩齒諸病用
之取其能散浮熱亦火鬱發之之義也辛能泄肺故
風寒欬嗽上氣者宜之辛能補肝故膽氣不足則肝
氣有餘驚癇眼目諸病宜之辛能潤燥故通少陰諸
經及耳竅閉塞者宜之又主痰結溼火鼻塞不利凡
口舌生瘡者用細辛黃連末摻之凡血虛內熱火鬱

頭痛發熱欬嗽者戒用以其辛烈耗散真氣也細辛辛之極者用不過五分

杜衡 俗名馬蹄香 又名杜葵 辛温無毒

發明 杜衡香竄與細辛相似故藥肆以之代充細

辛亦能散頭目風寒下氣消痰行水破血但其氣濁

不能搜滌少陰經中之寒稍遜細辛一籌耳

白微 苦鹹平無毒

本經主暴中風身熱肢滿忽忽不知人狂惑邪氣寒

熱痠疼溫瘧洗洗發作有時

發明 白微鹹平降泄抑陽扶陰爲足陽明經本藥

兼行足少陰手太陰本經主暴中風身熱肢滿是熱
鬱生風痰隨火湧故令忽忽不知人狂惑邪氣寒熱
痠疼皆熱邪所致溫瘧乃冬時伏邪至春而發繆氏
經疏言暑邪所傷秋必發爲溫瘧恐非經旨別錄療
傷中淋露者女子傷犯陰中營血而成淋露之疾用
以除熱益陰則前證瘳矣下水氣利陰氣者總取益

陰之功真陰益而邪水下性善降泄故久服利人金匱治婦人產中虛煩嘔逆安中益氣竹皮丸中用之千金治風溫發汗後身灼熱自汗身重多眠鼻息必齟語言難出萎蕤湯中用之又治婦人遺尿不拘胎前產後有白微芍藥湯取其有補陰之功而兼行手太陰以清膀胱之上原殊非虛寒不禁之比也古方多用治婦人者以別錄有療傷中淋露之功也凡胃虛少食泄瀉及喘欬多汗陽氣外泄者禁用

白前 甘辛微温無毒

發明 時珍曰白前入手太陰長於降氣肺氣壅實而有痰者宜之金匱治欬嗽而脈沉者用澤漆湯以中有白前也深師治久嗽上氣體腫短氣倚壁不得臥常作水雞聲者用白前湯外臺治久嗽吐血用白前桔梗桑白皮甘草皆取其下氣耳若虛嗽常哽氣者不可用也白前較白微稍温較細辛稍平專搜肺竅中風水非若白微之鹹寒專泄肺胃之燥熱亦不

似細辛之辛竄能治腎肝之沉寒也

本經逢原卷一終

渭南嚴式誨校字
成都劉彝銘覆校
山陰祝宗懷覆校